





御選唐宋詩醇卷之四十四

山陰陸游詩三

西巖翠屏閣

把酒孤亭半日留。西巖獨擅鶴山秋。也知絕境終難賦。且喜閑身得縱遊。鷗起危巢時磔磔。鹿鳴深澗暮呦呦。人生適意方為樂。甲第朱門祇自囚。

五六造語幽絕。寂歷之境宛然在目。

雨中山行至松風亭忽澄霽

煙雨千峰擁髻髮。忽看青嶂白雲間。卷藏破墨營邱筆。却展將軍着色山。

贈宋道人

我不如昔人。騎鶴上九天。玉簡奏事虛皇前。平生嗇養氣。處全兩脚馳走輕如煙。烏道懸崖忽飛蹇。戲擲短劍聲鏗然。轉盼跳下千仞淵。已復取劍升層巔。騰猿俊鷲爭後先。飢食松花掬飛泉。金骨綠髓漸凝堅。口哦七字黃庭篇。西來欲訪挾彈仙。丹經劍訣更精研。嗟哉一失五百年。作詩付子勿妄傳。

獵罷夜飲示獨孤生

白袍如雪寶刀橫。醉上銀鼓身更輕。帖草角鷹掀兔窟。憑風羽箭作鷓鳴。關河可使成南北。豪傑誰堪共死生。欲疏萬言投魏闕。燈前攬筆涕先傾。

直前胸臆流出如聞撫髀之歎

秋晚登城北門

幅巾藜杖北城頭。卷地西風滿眼愁。一點烽傳散關信。兩行雁帶杜陵秋。山河興廢供搔首。身世安危入倚樓。橫槊賦詩非復昔。夢魂猶繞古梁州。

神似少陵

莫秋

時序中年速。風霜客路長。孤愁巴月白。清夢楚山蒼。燈暗秋窗壁。鐘疏夜殿牀。端居有微祿。不敢恨殊方。

數日暄妍頗有春意予閑居無日不出遊戲作

小春花蕾索春饒。已有暄風入紫貂。村路雨晴鳩婦喜。射場草綠雉媒驕。苑邊結客飛金勒。樓上誰家弄玉簫。莫怪夕陽歸獨後。早梅喚我度谿橋。原註蜀宣華苑在摩訶池上

江樓醉中作

淋漓百榼宴江樓。秉燭揮毫氣尚遒。天上但聞星主酒。人間寧有地埋憂。生希李廣名飛將。死慕劉伶贈醉侯。戲語佳人頻一笑。錦城已是六年留。原註退之詩云越女一笑三年留

曳策原註遊房園作

慈竹蕭森拱廢臺。醉歸曳策一徘徊。紛紛落日牛羊下。黯黯長空霰雪來。三峽猿催清淚落。兩京梅傍戰塵開。客懷已是淒涼甚。更聽城頭畫角哀。

觸緒即來自是此翁忠悃與杜陵無二賞其氣之蒼老

謁漢昭烈惠陵及諸葛公祠宇

雨止風益豪。雪作雲不動。淒涼漢陵廟。衰草臥翁仲。畫妓空笙竽。土馬闕羈鞅。壤沃黃犢耕。柏密幽鳥哢。尚想忠武公。身任社稷重。整整滑上營。氣已無跛癰。少須天意定。破賊寧患眾。興亡信有數。星隕事可痛。陵邊四五家。蒨竹居接棟。手斲紙上箔。原註居民皆以造紙為業醅熟酒鳴甕。雖嗟生理微。亦足道飢凍。劉葛固雄傑。閱世均一夢。論高常近迂。才大本難用。九原不可作。再拜臨風慟。

潘閔奇曰事未必然聊為孔明吐氣

大雪歌

原註累日作雪竟不成戲賦此篇

長安城中三日雪。潼關道上行。人絕。黃河鐵牛僵不動。承露金盤凍將折。虬鬚豪客狐白裘。夜來醉眠寶釵樓。五更未醒已上馬。衝雪却作南山遊。千年老虎獵不得。一箭橫穿雪皆赤。擊空爭死作雷吼。震動山林裂崖石。曳歸擁路千人觀。觸體作枕皮蒙被。人間壯士有如此。胡不來歸漢天子。一腔豪氣千古奇。文覺希逸雪賦直是兒女情。多風雲氣少。

訪客至西郊

撼撼敗葉飛。黯黯寒雲低。村墟與市里。觸目一慘悽。今日病體輕。駕言適城西。丹柿滿野店。青帘出江隄。獵騎載雉兔。樵擔懸鷄雞。居人各自得。使我念故谿。故谿不敢說。况復朝金閨。傷哉鬻雪翁。歲晚猶牧豕。下愚不自還。大惑終身迷。君恩何由報。力耕愧黔黎。

夜寒

清夜焚香讀楚詞。寒侵貂褐歎吾衰。輕冰滿研風聲急。忽記山陰夜雪時。

故蜀別苑在成都西南十五六里。梅至多有兩大樹。天矯若龍。相傳謂之梅龍。予初至蜀嘗為作詩。自此歲常訪之。今復賦一首。丁酉十一月也。

昔年曾賦西郊梅。茫茫去日如飛埃。即今衰病百事懶。陳迹未忘猶一來。蜀王故苑犁已遍。散落尚有千雪堆。朱樓玉殿一夢破。煙蕪牧笛遺民哀。兩龍臥穩不飛去。鱗甲脫落生莓苔。精神最遇雪月見。氣力苦戰冰霜開。羈臣放士耿獨立。淑姬靜女知誰媒。堆傷雖多意愈厲。直與天地爭春回。蒼然老氣壓桃李。笑我白髮心尚孩。微風故為作嫵媚。一片吹入黃金罍。

詩以言情賦物而情不至不足以為詩羈臣放士耿獨立淑姬靜女知誰媒蓋亦黯然自傷矣

閑意

柴門雖設不曾開。為怕人行損綠苔。妍日漸催春意動。好風時捲市聲來。學經妻問生疏字。嘗酒兒斟漱盞盃。安得小園寬半畝。黃梅綠李一時栽。

書雨

仲冬候始寒。丙夜天正黑。雨來挾風助。吼擊不遺力。聲如拔高山。勢若伐強國。初憂老柏折。遂恐石筍踣。乾坤本無心。百神各效職。蛟龍鬪歲暮。豪橫理莫測。農功幸已成。龍怒亦會息。屋漏何足言。袖手姑默默。信手拈來輒成奇。語中閒接筆尤為健絕。

暮冬夜宴

官機錦茵金感鳳。舞娃釵墮雙鬟重。寶爐三尺香吐霧。畫燭如椽風不動。主人愛客情無已。琴聲未斷歌聲起。亦知百歲等朝露。便恐一歡成覆水。爐紅酒綠春為回。坐上梅花連夜開。堂前咫尺異氣候。水合平池霜壓階。

妙於諷諭風人之遺

謁石犀廟

開過石犀祠。登堂一歎欷。江回陵谷變。碑斷市朝非。原註有五蜀時修廟碑銘荒圃連寒壠。斜陽映夕霏。興亡俱昨夢。惆悵跨驢歸。

江上散步尋梅偶得絕句

小南門原註萬里橋門一名小南門外野人家。短短疏籬綠白沙。紅稻不須鸚鵡啄。清霜催放兩三花。

大醉梅花下走筆賦此

閉門坐歎息。不飲輒千日。忽然酒興生。一醉須一石。檐頭花易老。旗亭酒常窄。出郊索一笑。放浪謝形役。把酒梅花下。不覺日既夕。花香襲襟袂。歌聲上空碧。我亦落烏巾。倚樹吹玉笛。人間奇事少。頗謂三勅敵。酒闌江月上。珠樹掛寒壁。便疑從此仙。朝市長掃迹。醉歸亂一水。頗與異境隔。終當騎梅龍。梅上看春色。

原註梅龍蓋蜀苑中故物也

風流清興如在目前

廣都江上作

微波不搖江。纖雲不行天。我來倚杖立。天水相澄鮮。平遠望不盡。日落自生煙。梅花耿獨立。雪樹明前川。好風吹我衣。春色已粲然。東村聞酒美。買醉上漁船。

道室夜意

寒泉漱酒醒。午夜誦仙經。茶鼎聲疏蚓。香盤火度螢。齋心守元牝。閉目得黃寧。寄語山中友。因人送茯苓。黃庭經何不食氣太和精。故能不死入黃寧。注即黃庭也。

城南王氏莊尋梅

涸池積槁葉。茆屋圍疏籬。可憐庭中梅。開盡無人知。寂寞終自香。孤貞見幽姿。雪點滿綠苔。零落尚爾奇。我來不須晴。微雨正相宜。臨風兩愁絕。日暮倚筇枝。

骨格不凡

遊諸葛武侯書臺

沔陽道中草離離。臥龍往矣空遺祠。當時典午稱猾賊。氣喪不敢當主師。定軍山前寒食路。至今人祠丞

相墓松風想像梁甫吟。尚憶幡然會三顧。出師一表千載無。遠比管樂蓋有餘。世上俗儒寧辨此。高臺當日讀何書。

警策語故不在多

眉州披風榭拜東坡先生遺像

蜿蜒回顧山有情。平鋪十里江無聲。孕奇蓄秀當此地。鬱然千載詩書城。高臺老仙誰所寫。仰視眉宇寒峰嶸。百年醉魂吹不醒。飄飄風袖筇枝橫。爾來逢迎厭俗子。龍章鳳姿我眼明。北扉南海均夢耳。謫墮本自白玉京。惜哉畫史未造極。不作散髮騎長鯨。故鄉歸來要有日。安得春江變酒從公傾。

南定樓遇急雨

行遍梁州到益州。今年又作度瀘遊。江山重複爭供眼。風雨縱橫亂入樓。人語朱離逢峒獠。棹歌欸乃下吳舟。天涯住穩歸心懶。登覽茫然却欲愁。

屬對之妙神韻自然不可湊泊

舟中對月

百壺載酒遊凌雲。醉中揮袖別故人。依依向我不忍別。誰似峨眉半輪月。月窺船窗挂淒冷。欲到渝州酒初醒。江空裊裊釣絲風。人靜翩翩萬中影。哦詩不睡月滿船。清寒入骨我欲仙。人閒更漏不到處。時有沙禽背船去。

涪州道中

遠客喜歸路。清遊逾昔聞。雨添山翠重。舟壓浪花分。洛史經名世。張侯勇冠軍。原註郡境有伊川先生故居及張翼德祠懷人不可靚袖手對爐熏



北巖原註有程正叔先生祠堂

艤船涪州岸。攜兒北巖遊。搖檝橫大江。褰裳躡高樓。雨昏山半失。江漲地欲浮。老矣寧再來。為作竟日留。烏帽程丈人。閉戶本好修。駭機一朝發。議罪至竄投。黨禁久不解。胡塵暗神州。修怨以稔禍。哀哉誰始謀。小人無遠略。所懷在私讐。後來其鑑茲。賦詩識巖幽。

持論嚴正所見者大集中如此等作於君子小人之分判若黑白足以觀其所處矣

忠州禹廟

古郡巴蠻國。空山夏禹祠。鴉歸暗庭柏。巫拜薦江籬。草蔓青緣壁。苔痕紫滿碑。欲歸頻悵望。回棹夕陽時。雖非橘柚龍蛇之比亦老氣無敵

龍興寺弔少陵先生寓居

中原草草失承平。戍火胡塵到兩京。扈蹕老臣身萬里。天寒來此聽江聲。

雙管齊下一寫兩枝

張完臣曰艸艸二字狀盡衰世景象謂之咏少陵可謂之自咏亦可

遊萬州岑公洞

原註岑公清時人居此二十年得道仙去

大業征遼發閭左。軍興書檄煎膏火。此時也復有閑人。自引巖泉拾山果。後六百歲吾來遊。洞中正夏淒如秋。乳石牀平可坐臥。水作珠簾月作鉤。千年神遊八極表。浮名坐覺秋豪小。試問岑公迎我不。鶴飛忽下青松杪。

萬州放船過下巖小留

畫船四月滿旗風。欽散匆匆鷁首東。醉裏偏憐江水綠。意中已想荔枝紅。斷碑零落莓苔遍。幽澗淙瀉略

約通一足寧無好東絹。憑誰畫此碧玲瓏。

楚城

江上荒城猿鳥悲。隔江便是屈原祠。一千五百年間事。只有灘聲似舊時。

王士正曰歸州在江北山巔江南有楚臺山上有楚王臺及舊秭歸城三閭大夫實產是鄉王龜齡詩城郭舊為夔子國人民多是楚王孫陸放翁詩江上荒城猿鳥悲隔江便是屈原祠一千五百年間事只有灘聲似舊時何仲默詩古郡山頭數家住客舟江上一燈明竹枝慣聽巴人曲烏道繞通楚國程荒山寒日江聲怒號獨坐吟此數詩不必猿鳴三聲淚霑裳也張完臣曰聲味都盡而語氣不斷此之謂詩

舟出下牢關

大舸凌驚濤。飛度青玉峽。虛壁雲濛濛。陰洞風颯颯。拂天松蓋偃。入水山脚插。炎曦忽摧破。亭午手忘箑。懸知今夜喜。月白宿沙夾。曠哉七澤遊。盟鷗不須歎。

押韻皆穩

峽口夜坐

三峽至此窮。兩壁猶峭立。估船無時行。婦盍有夜汲。風生樹影動。月碎水流急。草根綴微露。螢火飛熠熠。吾行已四旬。纔抵楚西邑。浩歌散鬱陶。還舟覺衣濕。

初到荊州

萬里泛仙槎。歸來鬢未華。蕭蕭沙市雨。淡淡渚宮花。斷岸添新漲。高城咽晚笳。船窗一樽酒。半醉落烏紗。

阻風

沙市三日風。萬鼓鳴船頭。欲去不得發。臥對青燈幽。聽兒誦離騷。可以散我愁。微言入孤夢。恍與屈宋遊。睡起銅瓶響。欣然喚茶甌。吾道無淹速。風伯非所尤。

○小雨極涼舟中熟睡至多

舟中一雨掃飛蠅。半脫綸巾臥翠藤。清夢初回窗日晚。數聲柔櫓下巴陵。

盧世灌曰。只末一句有多少蘊含在。

岳陽樓

身如病鶴短翅翎。雨雪飄灑號沙汀。天風忽吹不得住。東下巴峽泛洞庭。軒皇張樂雖已矣。此地至今朝百靈。雄樓巖峩鎮吳楚。從來舉手捫天星。帆檣繞放已隱隱。雲氣亂入何冥冥。龜鼉出汲蛟鱓橫。浪花遮盡君山青。黃衫仙翁喜無恙。袖劍近到城南亭。眼前俗子敗人意。安得與翁同醉醒。

黃鶴樓

手把仙人綠玉枝。吾行忽及早秋期。蒼龍闕角歸何晚。黃鶴樓中醉不知。江漢交流波渺渺。晉唐遺跡草離離。平生最喜聽長笛。裂石穿雲何處吹。

別出機軸。邈然清曠。結語運化入妙。幾於滅盡鍼線之迹。

白雪堂登四望亭因應訪蘇公遺迹至安國院

我醉飛屐登屨顛。拄杖出沒風煙間。三山葱朧蛟鱓靜。九闕肅穆虎豹閑。幾年金骨煉綠髓。此日始得窮躋攀。老僊歸侍紫皇案。空有野水瀧淪瀾。蜿蜒翠草圍綠野。似嶺非嶺山非山。向來龍蛇滿雪壁。雷電下取何時還。名花亦已天上去。居人指似題詩處。九十一翁不識公。我抱此恨知無窮。

原註定惠院已廢海棠亦不復在安國老

舟行蘄黃間雨霽得便風有感

天青雲白十分晴。帆飽舟輕盡日行。江底魚龍貪晝睡。淮南草木借秋聲。好山縹渺何由住。華髮蕭條只自驚。莫怪時人笑疏嬾。宦情元不似詩情。

長風沙

江水六月無津涯。驚濤海浪高吹花。鶻聲已出雁翅浦。荻夾喜入長風沙。長風自古三巴路。檣竿參差雜煙樹。南船北船各萬里。淒涼小市相依住。歌呼雜盜燈火明。黃昏風死浪亦平。勞苦舟師刺沽酒。安穩明朝到池口。

登賞心亭

蜀棧秦關歲月邁。今年乘興却東遊。全家穩下黃牛峽。半醉來尋白鷺洲。黯黯江雲瓜步雨。蕭蕭木葉石城秋。孤臣老抱憂時意。欲請遷都涕已流。

將至京口

臥聽金山古寺鐘。三巴昨夢已成空。船頭坎坎回帆鼓。旗尾舒舒下水風。城角危樓晴靄碧。林間雙塔夕陽紅。銅瓶愁汲中濡水。不見茶山九十翁。原註項在京口嘗取中濡水寄曾文清公

汴谿

射的峰前禹廟東。短篷三扇臥衰翁。開樽清聖濁賢酒。重試朝南莫北風。水落痕留紅蓼節。雨來聲滿綠蒲葦。衝煙莫作匆匆去。擬看溪丁下釣筒。

冬夜聞雁有感

從軍昔戍南山邊。傳烽直照東駱谷。軍中罷戰壯士閒。細草平郊恣馳逐。洮州駿馬金絡頭。梁州毳毳日

打毬玉杯傳酒和鹿血。女真降虜輝瑩篋。大呼拔幟思野戰。殺氣當年赤浮面。南遊蜀道已依摧。猶據胡牀飛百箭。豈知蹭蹬還江邊。病臂不復能開弦。夜聞雁聲起太息。來時應過桑乾磧。豪邁一任壓倒高岑。

月夕

開戶滿庭雪。徐看知月明。微風入叢竹。復作雪來聲。俗塵不待掃。凜然肝肺清。村深無漏鼓。鶴唳報三更。以雋語寫幽致。列于御風冷然善也。

自雲門之陶山肩輿者。失道行亂山中有茅舍。小塘極幽遠。求見主人不可。意其隱者也。

陂池幽處有茅堂。井白蕭條草樹荒。小鴨怯波時聚散。病蔬傷蠹半青黃。童兒衝雨收魚網。婢子聞鐘上佛香。我亦暮年思屏迹。數椽何計得連牆。

園中雜書

殘花委地筍掀泥。香旛詩藁到處攜。幽夢欲成誰喚覺。半窗斜日鷓鴣啼。

池亭夜賦

池上小亭幽。清膏秉燭遊。荷盤時瀉露。螢火早知秋。有感歲時速。無聲河漢流。殊方不堪住。歸夢繞滄洲。

雙清堂夜賦

陸子病少間。獨臥谿上堂。人靜魚自躍。風定荷更香。素月行中天。流螢失孤光。歸鳥飛有聲。度此十里塘。嗟我獨何事。遲暮客異鄉。太息搔短髮。起視夜未央。

妙於體物流螢失孤光。與螢火早知秋。各有妙理。風定荷更香。風定池蓮自在。香亦復各成妙句。前後三詩不妨並存。

橋南納涼

曳杖來追柳外涼。畫橋南畔倚胡牀。月明船笛參差起。風定池蓮自在香。半落星河知夜久。無窮草樹覺城荒。碧筒莫惜頽然醉。人事還隨日出忙。

初秋夢故山覺而有作

波水白茫茫。草煙濕霏霏。牧童一聲笛。落日無餘暉。道山已漸隱。村巷亞竹扉。老翁延我入。苦謝柿栗微。幸逢歲有秋。一醉君勿違。念此動中懷。命駕吾將歸。

別建安

敬帽揚鞭晚出城。驛亭燈火向人明。多情葉上蕭蕭雨。更把新涼送客行。

紫谿驛

源註信州鉛山縣

雲外丹青萬仞梯。木陰合處子規啼。嘉陵棧道吾能說。略似黃亭到紫谿。筆有天趣此作運。化工部下篇。又用太白皆極鑪錘之妙。

月巖

幾年不作月巖遊。萬里重來已白頭。雲外連娟何所似。平羌江上半輪秋。淡淡自合刻劃即失之矣。

聞雁

過盡梅花把酒稀。重籠香冷換春衣。秦關漢苑無消息。又在江南送雁歸。

張完臣曰可謂深至

春雨

冬旱土不膏。愛此春夜雨。四郊農事興。老穉迭歌舞。相呼長沮耕。分喜樊遲圃。豐年已在目。亭障靜桴鼓。我歸未有期。一官寄倉廩。幸復寬簡書。不敢恨羈旅。平平寫去淡雅可愛。豐年十字抵得一篇喜雨亭記。

南窗睡起

夢中忘却在天涯。一似當年錦里時。狂倚寶箏歌白紵。醉移銀燭寫烏絲。酒來郫縣香初壓。花送彭州露尚滋。起坐南窗成絕嘆。玉樓乾鵲誤歸期。

盧世淮曰三四俊爽自是佳句

晝漏迢迢暑氣清。不妨小倦帶餘醒。夢從籠客聲中斷。愁向湘屏曲處生。風度簾旌紅浪颭。窗明香岫碧雲橫。閒情賦罷憑誰寄。悵望壺天白玉京。

感舊絕句

鵝黃酒邊綠荔枝。原註鵝黃廣漢酒名綠荔枝出故州摩訶池上納涼時。冰紈不畫驂鸞文。却寫江南白紵辭。

盧世淮曰有世外音響當於空際遇之

夏日晝寢夢遊一院闌然無人。簾影滿堂。惟燕蹋箏弦有聲覺。而聞鐵鐸風響。玆然殆所夢也。邪因得絕句

桐陰清潤雨餘天。簷鐸搖風破晝眠。夢到畫堂人不見。一雙輕燕蹴箏弦。

書懷絕句

不到天台三十年。草菴猶記宿雲邊。老僧曉出松門去。手挈軍持取澗泉。

絕句源出樂府。但取神韻。趣在有意無意之間。唐人推青蓮龍標二家。擅場作者。妙處深得風人之致。視

唐殆無愧色此不可以時代拘者也

雨後極涼料簡篋中舊書有感

日昃小雨不至晡雨雖未足涼有餘細泉冷冷咽幽竇清吹策策驚高梧笠澤老翁病蘇醒欣然起理西齋書十年燈前手自校行間顛倒黃與朱區區樸學老自信要與萬卷歸林廬爾來世俗好變古鑿空飾詐無根株愀然撫几三太息力薄抱恨何由祛蘭臺漆書非已責且為籤牒除蠹魚

秋夜

湖海秋初到房櫳夜轉幽露濃驚鶴夢月冷伴蛩愁生計依微綠年光墮遠遊巖灘已在眼早晚放孤舟  
原註去年欲自三衢舟行泛七里瀕歸山陰今竟當為此行也

雨夜

庭院蕭條秋意深銅爐一炷海南沈幽人聽盡芭蕉雨獨與青燈話此心

豐城高安之閒憇民家景趣幽邃為之慨然懷歸

數家聚雲根細路入叢薄濺濺石渠水來往一略約有無鄰里通笑語婦子樂濁醪時相就青蔬缺鹽酪日暮歸閉門續火星煜爚先期畢租稅老不入城郭嗟子獨何事早插紅塵腳故山未成歸悵望有餘恔

寄奉新高令

小雨催寒著客袍草行露宿敢辭勞歲飢民食糟糠窄吏惰官倉鼠雀豪只要閭閻寬筭楚不須亭障肅弓刀九重屢下丁寧詔此責吾曹未易逃

此真良二千石矣察吏恤安民弭盜奉公任職八白中色色具到一氣湏成不尤不厲風雅遺軌何可多得鶴林玉露載王十朋直德秀二詩命意雖同而氣格相去遠矣



子欲自嚴買船下七里灘。謁嚴光祠而歸。會灘淺陸行至桐廬始能泛江。因得絕句。  
桐廬縣前鶻聲急。蒼煙茫茫白鳥雙。亂山日落潮未落。勝絕不減吳松江。

風格絕佳

辛丑正月三日雪

開歲尚殘冬。佳哉雪意濃。酒歸千里麥。聲亂五更鐘。簾隙收初密。牆隅積已重。龍團笑羔酒。狐腋襲駝茸。  
危檻臨欹竹。幽窗聽墮松。忽思西戍日。憑堞待傳烽。原註子從戍日嘗大雪中登興元城上高興亭待平安火至

龍團笑羔酒用陶穀事妙於不覺  
雪霽歸湖上過千秋觀少留

縱轡不嫌遠。逢山猶一登。夕陽波渺渺。殘雪塔層層。折竹橫遮道。飢鳥下啄冰。欲歸還小駐。倚杖對峻嶒。  
題山家壁

山中無傳漏。猿鳴知既夕。芳藤上幽援。素月照高壁。主人殊喜事。歡若有夙昔。稚子築竹槃。炊黍持餉客。  
卜隣雖未辦。清嘯聊自適。衰病久廢詩。筆端歎荆棘。

憶昔

憶昔浮江發劍南。夕陽船尾每相銜。補陰暗處尋高寺。荔子紅時宿下巖。原註高寺在廬州破口烹猪宰下巖在雲安軍  
龍廟沙頭伐鼓挂風帆。區區陳迹何由記。惟有征塵尚滿衫。

秋夜

秋氣侵帷夢不成。一燈西壁翳還明。風高露井無桐葉。雨急煙村有雁聲。擊筑誰同燕市飲。質春方作會稽行。從來自許知何等。堪歎江湖白髮生。

印... 卷之三 詩集

涼風又落南宮木。老雁孤鳴漢北州。不及領聯之含蘊。

九月三日泛舟湖中作

兒童隨笑放翁狂。又向湖邊上野航。魚市人家滿斜日。菊花天氣近新霜。重重紅樹秋山晚。獵獵青帘社酒香。隣曲莫辭同一醉。十年客裏過重陽。原註予自庚寅至辛丑始見九日於故山

新寒

病怯新寒欲不禁。南窗擁褐夜愔愔。江湖跌宕送餘日。書劍蕭條孤壯心。社曲新愁隨斷雁。遼陽遺恨入疏砧。此懷擬向何人說。賴有昏燈伴苦吟。

湖村月夕

客路風塵化素衣。閑愁冉冉鬢成絲。平生不負月明處。神女廟前聞竹枝。

盧世灌曰色相俱空。

橫塘

橫塘南北埭西東。拄杖飄然樂未窮。農事漸興人滿野。霜寒初重雁橫空。參差樓閣高城上。寂歷村墟細雨中。新買一簑苔樣綠。此生端欲伴漁翁。原註是日偶買蓑衣甚妙

蔬圃

山翁老學圃。自笑一何如。硤瘠財三畝。勤劬賴兩奴。正方畦畫局。微潤土融酥。剪闢荆榛盡。鉏犁磊塊無。過溝橫略約。聚甕起浮屠。原註拾圃中隙地成瓜援餘功及芋區如絲細生菜似鴨爛蒸壺此事合真辨

東歸不為鱸。

排此瑣事點染開情雖云游戲亦斐疊可觀

五雲門晚歸

高城帶遠林。落日動寒砧。行客自朝暮。青山無古今。衰遲慙逸氣。憂患足危心。溪道滯歸艇。何時春水深。以高韻勝。置盛唐人集中。不復可辨。

夜汲井水煮茶

病起罷觀書。袖手清夜永。四鄰悄無語。燈火正淒冷。山童亦睡熟。汲水自煎茗。鑿然轆轤聲。百尺鳴古井。肺腑凜清寒。毛骨亦蘇省。歸來月滿廊。惜踏疏梅影。

寄朱元晦提舉

市聚蕭條極。村墟凍飢稠。勸分無積粟。告糴未通流。民望甚飢渴。公行期滯留。徵科得寬否。尚及麥禾秋。惻然仁者之言。四十字不愧古人。羅大經謂文公於詩。獨取放翁。以其氣質渾厚。殆未足以盡之。

宋史文公本傳。淳熙七年。浙東大饑。易提舉浙東常平茶鹽事。即日單車就道。移書他郡。募米商。蠲其征比。至部。米已輻輳。與僚屬鈞訪民隱。至廢寢食。雖深山窮谷。存不遺事。竣宰相王淮贊於上曰。煮荒政。乃行其所學。民被實惠。

乍晴風日已和。泛舟至扶桑埭。徘徊西村久之。

十日風雨。今日晴。衰病忽減。思悶不接。羅一幅。煙霧薄。舴舺八尺。鳧鷖輕。亭亭孤塔。遠天碧。曲曲深巷。斜陽明。數家茅屋。門晝掩。不聞聲。聞碓聲。身似龐公不入城。東阡南陌。餘生新年。倘有豐年喜。買酒漁村看太平。

攜瘦尊醉梅吃

楠癭作尊容。斗。擁腫輪困元媚嫵。肯從放翁來住山。誰云置身不得所。山房寂寞久不飲。作意欲就梅

花語。我病鮮歡。花更甚。日暮。凄涼。殘雨。人生萬事雲茫茫。一醉常恐俗物妨。正須仙人冰雪膚。來伴老子。鐵石腸。花前起舞花底臥。花影漸東。山月墮。瘦尊未竭狂未休。笑起題詩識吾過。

城西待院後竹下作

水邊小邱田古城。上有巨竹數百箇。一徑蛇蟠不容腳。平處乃可十客坐。裊裊共看風枝舞。蔌蔌時聽春籜墮。古佛不妝香火冷。瘦僧如腊袈裟破。門前西去長安路。日夜舳舻銜尾過。老夫本乏臺省姿。且就清陰曲肱臥。

幽居春夜

暮景催人雪鬢雙。十年始復反吾邦。雲逢佳月每避舍。酒壓閑愁如受降。三弄笛聲初到枕。一枝梅影正橫窗。要知清夢遊何許。不釣桐江即錦江。

頸聯圓妙有彈丸脫手之樂

晨起

小雨濕清曉。新鶯曉早春。年光驚病眼。節物屬閑身。已破東連楚。嶠山北控秦。遠遊端可繼。敢恨素衣塵。

春遊

平生樂行役。不耐常開戶。今朝新雨霽。一笑整巾屨。青猿導幽蹊。春草伴微步。雖云尊酒薄。蔬果亦畧具。辛夷發高枝。楊柳吹墮絮。行歌不知遠。落日呼野渡。橫林已棲鴉。淺水猶立鷺。歸來意頗豪。古錦有新句。

八月十四日夜湖山觀月

長空露洗玻璃碧。紫金之盤徑三尺。忽看擘地出人閒。桂樹扶疏如淡墨。攬衣獨立鏡湖邊。風露萬頃秋渺然。開帆詎必入東海。騎鯨便可追飛仙。冰壺玉灑侵骨冷。醉看孤鸞舞清影。夜闌歸舍人已眠。却倩天

風為吹醒

奇語得自眼前轉覺出人意表

夜聞秋風感懷

西風一夜號庭樹。起攬戎衣淚濺襟。殘角聲催關月墮。斷鴻影隔塞雲深。數篇零落從軍作。一寸淒涼報國心。莫倚壯圖思富貴。英豪何限死山林。

草書歌

傾家釀酒三千石。開愁萬斛酒不敵。今朝醉眼爛巖電。提筆四顧天地窄。忽然揮掃不自知。風雲入懷天借力。神龍戰野昏霧腥。奇鬼摧山太陰黑。此時驅盡胸中愁。槌牀大叫狂墮憤。吳牋蜀素不快人。付與高堂三大壁。

與醉後草書一篇各成奇致

夜泊水村

腰間羽箭久凋零。太息燕然未勒銘。老子猶堪絕大漠。諸君何至泣新亭。一身報國有萬死。雙鬢向人無再青。記取江湖泊船處。臥聞新雁落寒汀。

率多胸臆兼有氣骨可為南渡君臣慨然太息

自妙相歸將至杜浦堰舟中作

斜陽發東郭。初夜轉西城。寺閣疏鐘動。漁村遠火明。蒼茫林靄滅。撲澆水禽驚。漸喜吾廬近。遙聞過壘聲。

[Faint, illegible text, likely bleed-through from the reverse side of the page]

御選唐宋詩醇卷之四十五

山陰陸游詩四

秋興

樵風溪上弄扁舟。濯錦江邊憶舊遊。豪竹哀絲真昨夢。爽砧繁杵又驚秋。墜枝橘熟初堪剪。浮瓮醅香恰受篘。莫道身閑總無事。孤燈夜夜寫清愁。

三江舟中大醉作

志欲富天下。一身常苦飢。氣可吞匈奴。束帶向小兒。天公無由問。世俗那得知。揮手散醉髮。去隱雲海涯。風息天鏡平。濤起雪山傾。輕帆入浩蕩。百怪不可名。虹竿秋月鉤。巨鼈倘可求。滅迹從今逝。回看隘九州。擬以太白使覺去人不遠。

樊江晚泊

碧雲吞日天欲晚。城西掖柁城東路。蓴羹菰飯香滿船。正是江頭落帆處。荻洲漁火遠更明。煙水蒼茫聞雁聲。不是綠尊能破悶。白頭客路苦為情。

秋夕

羈魂虛仗些詞格。病骨那禁積毀消。亂葉打窗寒有信。昏燈照幔夢無聊。棧邊老驥心空在。爨下殘桐尾半焦。百感忽生推枕起。碧霄銀漢正迢迢。

深於此興怒而不怒

秋雨排悶十韻

令夏久無雨。從秋却少晴。空濛迷遠望。蕭瑟送寒聲。衣潤香偏著。書蒸蠹欲生。壞簷聞瓦墮。漲水見堤平。

溝溢池魚出。天低塞雁征。螢飛明閣廡。蛙鬧雜疏更。藥釀時須焙。舟閑任自橫。未憂荒楚菊。直恐敗吳杭。夜永燈相守。愁深細酒傾。浮雲會消散。鼓笛賽西成。

方回曰字字工穩

寄題朱元晦武夷精舍

先生結屋綠巖邊。讀易懸知屢絕編。不用采芝驚世俗。恐人謗道是神僊。身閑刺覺溪山好。心靜尤知日月長。天下蒼生未蘇息。憂公遂與世相忘。

惟朱子稱此詩惟此詩可寄朱子所云詩中有人者

長安道

千夫登登供版築。萬手丁丁供斷木。歌樓舞榭高入雲。複幕重簾晝燒燭。中使傳宣騎飛鞚。達官候見車。擊鼓豈惟炎熱可炙手。五月瞿唐誰敢觸。人生易盡朝露晞。世事無常壞改復。士師分鹿真是夢。塞翁失馬猶為福。君不見野老八十無完衣。歲晚北風吹破屋。

言抵藥石體合風雅

村舍

空谷人稀到。新寒病頓輕。晨霜催小獵。宿雨潤新耕。草莽秦馳道。雲煙越故城。千年不磨滅。惟有暮山橫。有俯仰千古之感。句法亦逼老杜。

幽居感懷

偶傍楓林結數椽。東歸也復度流年。汀洲雁下依殘水。墟里人行破夕煙。十月風霜欺客枕。五更鼓角滿江天。散關清渭應如昨。回手功名一愴然。



遲暮

遲暮固多感。況此歲崢嶸。霜霰忽已集。夜聞絡緯鳴。青燈不解語。依依有餘情。銅瓶煮寒泉。中作笙簫聲。沈憂能傷人。一夕白髮生。蓬萊渺雲海。金丹幾時成。

自若耶溪舟行杭鏡湖而歸

換馬亭前煙火微。鬪牛橋畔行人稀。雲山慘澹少顏色。霜日清薄無光輝。新酒芻成桑正落。美人信斷雁空歸。高樓何處吹長笛。清淚無端又濕衣。詞意清婉風調致佳。

骨相

骨相元知薄。功名敢自期。病侵彊健日。閑過聖明時。形勝輪臺地。飛騰瀚海師。江湖雖萬里。猶擬綴聲詩。意自深深非闊骨相。

感憤

令皇神武是周宣。誰賦南征北伐篇。四海一家天應數。兩河百郡宋山川。諸公尚守和親策。志士虛捐少壯年。京洛雪消春又動。永昌陵上草芊芊。大聲疾呼氣浮紙。上諸將五音之嫡嗣也。

盧世灌曰南渡樂於偏安誰能念此

晚出偏門

一段新愁帶宿醒。半欹烏帽策驢行。村墟香動梅初破。裘褐寒輕雪未成。渡口人爭紅日晚。沙邊雁帶碧煙橫。悠然又覓長堤路。腸斷城樓畫角聲。

過杜浦橋

橋北雨餘春水生。橋南日落暮山橫。問君對酒胡不樂。聽取菱歌煙外聲。

莊器之作招隱閣項平父諸人賦詩予亦繼作

諸公共賦反招隱。細字斜行肯見傳。語到淮南小山作。人如江左永和年。一窗蘿月禁春瘦。萬壑松風減晝眠。我亦尚嫌林谷淺。因君更擬斷雲煙。

溪上醉吟

行行不知溪路深。但怪素月生遙岑。不辭醉袖拂花絮。與子更醉青蘿陰。

雨中泊舟蕭山縣驛

端居無策散閑愁。聊作人閒汗漫遊。晚笛隨風來倦枕。春潮帶雨送孤舟。店家菰飯香初熟。市擔蓴絲滑欲流。自笑勞生成底事。黃塵陌上雪蒙頭。

春潮七字與蘇州各成妙句

初夏遊凌氏小園

水滿池塘葉滿枝。曲廊危榭愜幽期。風和海燕分泥處。日永吳蠶上簇時。開理阮咸尋舊譜。細傾白墮賦新詩。從來夏淺勝春日。兒女紛紛豈得知。原註度信詩云夏淺却勝春鏡湖遊人至立夏而止

題少陵畫像

長安落葉紛可掃。九陌北風吹馬倒。杜公四十不成名。袖裏空餘三賦草。車聲馬聲喧客枕。三百青銅市樓飲。杯殘鬻冷正悲辛。仗內鬪雞催賜錦。

初冬雜題

莫嫌風雨作新寒。一樹青楓已半丹。身在范寬圖畫裏。小樓西角刺憑闌。

小雨

細細濕春光。霏霏破夕陽。臥聞鶯倦枕。起看入虛堂。映葉鶯猶囀。爭泥燕正忙。閑愁無遣處。誰與共飛觴。工於賦物不落纖巧

題徐淵子環碧亭亭有茶山曾先生詩

茶山丈人厭囂譁。幅巾每訪博士家。小亭談笑不知暮。往往城上聞吹笳。興來傑作粲珠璧。歲久妙墨亡龍蛇。郎君弟子多白髮。回頭日月如轉車。徐御赤城古仙子。十年四海推才華。覽觀陳迹喜不寐。旋補罅漏支傾斜。曲池還浸古來月。叢莽忽見當時花。重題舊句照高棟。力振風雅排淫哇。席間紵袍已散鶴。堂上講鼓初停槌。速宜力置竹葉酒。不用更淪桃花原註桃花茶見曾公詩

臨安春雨初霽

世味年來薄似紗。誰令騎馬客京華。小樓一夜聽春雨。深巷明朝賣杏花。矮紙斜行閑作草。晴窗細乳戲分茶。素衣莫起風塵嘆。猶及清明可到家。領聯圍轉脫口而出一涉濼洎失此語妙

瞿佑曰陳簡齋詩云客子光陰詩卷裏杏花消息雨聲中陸放翁詩云小樓一夜聽春雨深巷明朝賣杏花皆佳句也葉靖逸詩云春色滿園關不住一枝紅杏出牆來戴石屏詩云一冬天氣如春暖昨日街頭賣杏花句意亦佳可以追及之

盧世淮曰三四有唐人風韻

方回曰臨安春雨初霽一首劍南集編在嚴州朝辭時所作後村詩話乃謂妙年行都所賦思陵賞音

似誤

飲張功父園戲題扇上

寒食清明數日中。西園春事又匆匆。梅花自避新桃李。不為高樓一笛風。

寓意雖刻自足風調

盧世灌曰翻案妙有諷意

小舟過御園

聖主憂民罷露臺。春風別苑畫常開。盡除曼衍魚龍戲。不禁芻蕘雉兔來。水鳥避人橫翠霧。宮花經雨委蒼苔。殘年信喜身強健。又作清都夢一回。

善於立言

春遊絕句

一百五日春郊行。三十六溪春水生。千秋觀裏逢急雨。射的峰前看晚晴。原註自秦望山而北合三十六溪水為若耶溪

雨後

礎潤還成雨。雲收旋作晴。巖花分日發。林筍逐番生。筆硯行常具。軒窗晚更明。塵埃幸不到。那得廢詩情。

夜汲

酒渴起夜汲。月白天正清。銅瓶響寒泉。聞之心自醒。井邊雙梧桐。映月影離離。上有獨棲鵲。細爪握高枝。

我欲畫團扇。良工不可求。三歎拊庭楮。浩然風露秋。

落落有古意

新霽城南舟中夜興

身是江湖不繫船。雨餘隨處一條然。浮雲盡斂出青嶂。孤月徐升行碧天。收網漁歌移別浦。隔城塔影落前川。明朝問就平洲飲。中履追涼又一年。

丙午五月大雨五日止。鏡湖渺然想見湖未廢時有感而賦。

朝雨暮雨梅正黃。城南積潦入車箱。鏡湖無復鐵青秋。直浸山腳白茫茫。湖三百里漢訖唐。千載未嘗廢陂防。此如長城限胡羌。嗇夫有秩走且僵。早有灌注水何傷。越民歲歲常豐穰。洪湖誰始謀不臧。使戎婦子饜糟糠。陵遷谷變亦何常。會有妙手開湖光。蒲魚自足被四方。煙艇滿目羨歌長。

有闕國計民生非尋常歌詠可比。

山陰志鏡湖綿跨二縣周廻三百五十八里。東漢馬臻始築塘蓄水溉田九千餘頃。迄於宋民甚利之。祥符以來並湖之民盜湖為田。熙寧中遣使至越不能復。湖後遂盡廢為田。皆已陞科議復古以興水利者常惜之而勢不可行。

會稽志張元忬曰。忬按諸家所論。前乎漢而無海塘則鏡湖不可不築。後乎宋而有海塘則鏡湖可以不復。近者三江之閘。其益百倍於海塘。惟時其啟閉以常。謹水利之大綱。而於外塘務完之內。流務濬。之以時修水利之細目。則受利不止一會稽矣。又何鏡湖之足論乎。

早自烏龍廟歸

殘漏聲中聽曳鈴。翩翩吹帽出郊坰。雨餘澗落雙虹白。雲合山餘一髮青。鐵馬蹴冰悲昨夢。朱顏辭鏡感頽齡。歸來獨對空齋冷。烏迹蒼苔目滿庭。

齋中閑咏

風號萬物作濤聲。雲截千峰似几平。多病支離仍老境。暮秋蕭瑟更山城。燕觴久罷塵痕積。庭訟全稀薛

量生。莫道齋中日無事。焚香掃地又詩成。  
六句可謂深穩。

秋雨北樹作

秋風吹雨到江濱。小閣疏簾曉色分。津吏報增三尺水。山僧歸入萬重雲。飄零露井無桐葉。斷續煙汀有雁羣。了却文書早尋睡。檐聲偏愛枕間聞。  
方回曰此巖陵郡圃也三四極工而活

焉耆行

焉耆山頭暮煙紫。牛羊聲斷行人止。平沙風急捲寒蓬。天似穹廬月如水。大胡太息小胡悲。投鞍欲眠且復起。漢家詔用李輕車。萬大戰雲來壓壘。  
焉耆山下春雪晴。莽莽惟有蒺藜生。射麋食肉飲其血。五穀自古惟聞名。樵蘇切莫近亭障。將軍臥護真長城。十年牛馬向南睡。知是中原今太平。

園中絕句

溪北溪南飛白鷗。夕陽明處見漁舟。憑誰為翦機中素。畫取天涯一片秋。

晨過天慶

蘿月挂團壁。松風號急灘。孤燈經院曉。殘雪醮壇寒。臍欲開扶杖。何妨醉墮冠。詩成興不盡。萬里跨青鸞。  
三四語意工絕。與棋聲花院靜。幡影石壇高。不可軒輊。

出城

翩翩烏帽出林坳。掠面風微酒半醒。戍火難尋玉闕夢。衣塵空愧草堂靈。天晴山雪明城郭。水漲江流近

驛亭客鬢不如堤上柳。數枝春動又青青。

夜登千峯樹

夷甫諸人骨作塵。至今黃屋尚東巡。度兵大岷非無策。收泣新亭要有人。薄醪不澆胷壘塊。壯圖空負膽輪囷。危樓插斗山銜月。徒倚長歌一愴神。

從空而下氣象高。遠歸咎王呂。自是千古公論。

潘問奇曰。劔南詩操觚家奉之如拱璧。然一時所為翕然者。不過喜其陶寫風雲。流連月露而已。而其惓惓宗國。悱惻纏綿。顧未有及之者。予為一一標識之。使知先生當日傷半壁之無依。痛兩宮之不返。終天歎悼。不徒區區景物閒也。比少陵庶幾一飯不忘之誼云。

秋興

孤城寂寞近江干。處處疏砧送早寒。水落纔餘半篙綠。霜高初染一林丹。民租屢減追胥少。吏責全輕法令寬。偶有一樽聊獨醉。強授黃菊助清歡。

余年二十時嘗作菊枕詩。頗傳於人。今秋偶復采菊。縫枕囊。悽然有感。

采得黃花作枕囊。曲屏深幌闕幽香。喚回四十三年夢。燈暗無人說斷腸。少日曾題菊枕詩。畫編殘彙鎖蛛絲。人間萬事消磨盡。只有清香似舊時。黯然自傷興沈園二絕。所感同而詞亦並工。蓋發乎情者深也。

東吳女兒曲

東吳女兒語如鶯。十三不肯學吹笙。鏡奩初喜穉蠶出。窗眼已看雙繭成。庭空日暖花自舞。簾卷巢乾燕新乳。阿弟貪書下學遲。獨揀詩章教鸚鵡。

絕似皮陸

有為予言烏龍高嶮不可到處有僧巖居不知其年子每登千峯樹望之慨然為作詩

樵子向予說有僧巢翠微巖扉雲共宿錫杖鶴同飛日暮松明火天寒榭葉衣棄官從此逝非子尚誰歸

楚宮行

漢水方城一何壯。大路並馳車百兩。軍書插羽擁修門。楚王正醉章華上。璇題藻井窮丹青。玉笙寶瑟聲冥冥。忽聞命駕遊七澤。萬騎動地如雷霆。清晨射獵至中夜。蒼兕元熊紛可藉。國中壯士力已殫。秦寇東來遣誰射。

妾命薄原註太白作此篇言長門宮事予反之

妾命薄。早入天家侍帷幄。君王勤儉省宴遊。寶柱朱絃塵漠漠。日長別殿承恩稀。肝旻猶聞親萬機。宮中

雖無珠玉賜。塞上不見煙塵飛。不須悲傷妾命薄。命薄却令天下樂。

高處立闕處行。

四鼓酒醒起步庭下

酒解夜過半。出門步中庭。天高河漢白。月澹煙霧清。重滴竹杪露。疏見樹罅星。環螿啼寒壁。深竹明孤螢。秋晚雖未霜。蠹葉時自零。四序逝不留。慨然感頽齡。平生茅一把。不博帶萬釘。鴻溝謝拍拍。鴻路追冥冥。

秋霽

灑氣明山川。霽色滿天地。西風吹我衣。忽有萬里意。中原運當平。所要在得士。餘年猶幾何。棄置復棄置。短幅森巖中。極頓挫之妙。

採藥



簣子編成細箬新。獨穿空翠上嶙峋。丹砂巖際朝曦日。枸杞雲間夜吠人。絡石菖蒲蒙綠髮。纏松薜荔長蒼鱗。金貂謁帝我未暇。且作人間千歲身。

塞上曲

將軍許國不懷歸。又見桑乾木葉飛。要識君王念征戍。新秋已報賜冬衣。

自合唐音

送潘德久使薊門

崑崙東分一枝渾。奔蹶砥柱經龍門。羲皇受圖撫上古。神禹治水開中原。三靈寶扶藝祖業。萬國共仰東都尊。羣兒撞壤吁可嘆。顧使殘虜今遊魂。因君試求出師路。孟津白馬應如故。不須更議繫河橋。北風正可乘冰渡。頗聞盧龍已數盡。復道飛狐合屯戍。轅門倘駐拂雲祠。烽火應過明妃墓。君歸解鞍藉芳草。細談塞北忘子老。讀書飲酒待賊平。萬大旄頭方下掃。

老驥伏櫪志在千里游。豈須更忘恢復者。况觸事感懷耶。端莊雜流麗剛健含婀娜。可以語此詩之妙。

夜歸導街巷書事

近坊燈火如晝明。十里東風吹市聲。遠坊寂寂門盡閉。只有煙月無人行。誰家小樓歌惱儂。餘響縹緲縈簾櫳。苦心自古乏真賞。此恨畧與吾曹同。歸來空齋臥淒冷。燈前病骨嶢嶢影。獨吟古調遣誰聽。聊與梅花夜夜永。

送張野夫寺丞牧滁州

皇天方憂九州裂。建隆真人仗黃鉞。陣雲冷壓清流關。賊壘咿嚶氣如髮。逋誅猾虜入檻車。北風吹乾草頭血。一龍上天三百年。舊事空聞遺老說。金印斗大誰作州。公子玉面蒼髯虬。賦詩健筆挾風雨。論兵辯

舌森戈矛。別君帳飲滿橋頭。長歌為君寬旅愁。戰場遺迹儘可畫。又素寄我關河秋。  
唐之子孫不能以天下取河北志士之慨於言外見之

夜歸偶懷故人獨孤景畧

買酒村場半夜歸。西山落月照柴扉。劉琨死後無奇士。獨聽荒雞淚滿衣。

觸緒長嗟言在此而意在彼十四字中波瀾甚闊賀裳詩話乃謂務觀才具無多意境不遠惟善寫眼前景物豈非但見方隅者耶

月下小酌

草樹已秋聲。郊原喜晚晴。風生雲盡散。天闊月徐行。下箸槎頭美。傳杯甕面清。進歡猶可勉。但歲不須驚。

鄒曲有未飯被追入郭者憫然有作

春得香秬摘綠葵。縣符急急不容炊。君王日御金華殿。誰誦周家七月詩。

親民之官莫如守令與人主共養百姓同休戚者其惟良吏乎漢治之稱文景有以也

題湖邊旗亭

春色初回杜若洲。佳人又典鸕鷀裘。八千里外狂漁父。五百年前舊酒樓。渡口遠山翠黛。天邊新月挂瓊鉤。回頭笑向紅塵說。也有閒愁到此不。

落筆豪俊宋人常問人云君詩中有幾酒樓此亦一酒樓也

寓懷

脫粟未為飢。短褐未為寒。眾毀心自可。身困氣愈完。茆屋雖三間。跌足則已寬。濁酒不滿瓢。浩歌有餘歡。祿食妻子樂。功名後人看。成敗兩蝸角。貴賤一鼠肝。茫茫百年夢。底物堪控搏。不如學餐霞。駐此雙頰丹。

行披終南雲。飛渡黃河湍。歸然過空城。人言古長安。霜露蒙荆榛。喟然增永歎。國恥未雪此老終。身大恨固其忠義所結。然言之頻數亦為筆墨之累。此乃別有波瀾。言盡而意不盡。

題千秋觀懷賀亭

河湟使典珥左貂。曲江相君謝不朝。宮中玉環孤作妖。黠虜旁窺心已驕。天維欲絕地軸搖。有識凜凜憂宗祧。賀公託言師松喬。黃冠徑歸侶漁樵。老馬立仗不自聊。去如鸞鳳冲煙霄。傾都祖餞擁渭橋。賢哉大夫脫塵囂。揚州渡江木蘭橈。入東夜聽錢塘潮。我來故祠竹蕭蕭。黃冠野服傳生綃。詞卑媿匪英瓊瑤。空采蘋藻奠桂椒。虛堂斷香開寂寥。遺魂零落何由招。論古別有見解。

樊江

手中一卷養魚經。又向樊江上草亭。朝雨染成新漲綠。春煙澹盡遠山青。榜舟不厭頻來往。岸幘常須半醉醒。賦罷新詩自高詠。滿汀鷗鷺欲忘形。

自饒雅韻

練塘

微風吹頰酒初醒。落日舟橫杜若汀。水秀山明何所似。玉人臨鏡暈螺青。

歸次樊江

芳草東西路。綠楊長短亭。人生豈匏繫。吾志本鴻冥。征袖朝霑雨。歸帆夜戴星。長魚幸能買。且復倒殘瓶。

泛湖至東涇

春水六七里。夕陽三四家。兒童收鵝鴨。婦女治桑麻。地僻衣巾古。年豐笑語譁。老夫維小艇。半醉摘藤花。

村居初夏

天遣為農老故鄉。山園三畝鏡湖傍。嫩莎經雨如秧綠。小蝶穿花似繭黃。斗酒隻雞人笑樂。十風五雨歲豐穰。相逢但喜桑麻長。欲話窮通已兩忘。

盧世淮曰此景真不可多得

東關

煙水蒼茫西復東。扁舟又繫柳陰中。三更酒醒殘燈在。臥聽蕭蕭雨打篷。

七月一日夜坐舍北水涯戲作

兀傲胡牀酒半醒。釣筒收盡數舟橫。風生細葛無三伏。月上疏林正四更。北斗離離依欲盡。明河脈脈去無聲。斥鴳豈復塵中戀。便擬騎鯨返玉京。以星河供點染。少加運用使有景有情。

以事至城南書觸目

十里西風吹帽帚。江城衣杵遠猶聞。路如劍閣逢秋雨。山似爐峰鎖暮雲。原上老翁眠犢背。籬根小婦牧羊羣。百錢且就村場醉。舌本醅醕莫苦分。

感舊意正以不露為佳

梅花絕句

憶昔西戍日。夜宿僊人原。風吹野梅香。夢繞江南村。依空銀一鉤。糝野玉三尺。愁絕水邊花。無人問消息。

題瑩上人二畫

天地又秋風。谿山憶剡中。孤舟幸鬧著。借我訪支公。

右剡谿

曉聽楓橋鐘。暮泊松江月。斯人亦可人。淡墨寫愁絕。

右吳江

山家暮春

遠屋清陰合。綠堤綠草纖。起蠶初放食。新麥已磨鎌。苦筍先調醬。青梅小蘸鹽。佳時幸無事。酒盡更須添。

瑣事老筆

自詠

萬事不挂眼。終年常避人。荒畦荷鋤晚。環堵結涼新。病馬何勞斥。輕鷗未肯馴。雖愁市門卒。聊作葛天民。

蓬萊館午憩

驛門繫馬聽蟬吟。翻動平生萬里心。橋畔笛聲催日落。城邊草色帶煙深。關河歷歷功名晚。歲月悠悠老病侵。憶戍梁州如昨日。憑闌西望一霑襟。

盧世灌曰悲壯

夢遊散關渭水之間

半生望眼怯天涯。客裏何堪度歲華。但恨征輪無四角。不愁客路有三叉。驛窗燈闇傳秋杵。關樹煙深宿暮鴉。叱犢老翁頭似雪。羨渠生死不離家。

完題簡淨

秋夜

荷花

清夜不成寐。出門還浩歌。斷雲微翳月。薄露不傾荷。絡緯知時早。梧桐奈汝何。非關老懷惡。秋物感人多。  
風露青冥。水面涼。旋移野艇受清香。猶嫌翠蓋紅妝句。何況人言似六郎。  
隨手翻新居然佳語

秋興

老子雖貧未易量。風流猶在小茆堂。蒲萄錦覆桐孫古。鸚鵡螺斟玉澆香。千點荷聲先報雨。一林竹影剩  
分涼。秋來使有欣然處。新種蓴絲已滿塘。

新晴

積雨已淒冷。新晴還少和。稼收平野闊。木落遠山多。土潤朝畦菜。機鳴夜擲梭。時清年歲好。吾敢歎蹉跎。  
盧世灌曰領聯自是佳句

舍北望水鄉風物戲作絕句

西風沙際矯輕鷗。落日橋邊繫釣舟。乞與畫工團扇本。青林紅樹一川秋。

禹跡寺南有沈氏小園四十年前嘗題小閣壁間偶復一到而園已易主刻小閣於石讀之悵然

楓葉初丹樹葉黃。河陽愁鬢怯新霜。林亭感舊空回首。泉路憑誰說斷腸。壞壁醉題塵漠漠。斷雲幽夢事  
茫茫。年來妄念消除盡。回向禪龕一炷香。

周密曰放翁娶唐氏於其母為姑姪而不相得出之後改適趙士程嘗以春日出遊相遇於禹跡寺南

之沈氏園唐以語趙遣致酒肴翁悵然久之為賦釵頭鳳詞題園壁間集中紅酥手黃藤酒一闕是也  
唐氏見而和之未幾下世

小園

窄窄柴門短短籬。山家隨分有園池。客因問字來攜酒。僧趁分題就賦詩。晨露每看花蕊坼。夕陽頻見樹

陰移原註此二事非拂衣司諫猶忙在。此趣淵明却少知。

盧世淮曰：閑情逸事，惟外人知之。

夜讀范至能攬轡錄言：中原父老見使者，多揮涕感其事，作絕句。

公卿有黨排宗澤，帷幄無人用岳飛。遺老不應知此恨，亦逢漢節解沾衣。

南渡之不振，實由於此。扼腕而言，自成高調。

醉臥松下短歌

披鹿裘，枕白石。醉臥松陰當月夕。寒藤天矯學草書。天風蕭森入詩律。忽然夢上百尺顛。綠毛漣迤巢雲

仙。相攜大笑咸陽市。俯仰塵世三千年。

造語人妙

探梅

我遊東村衝暮煙。斷橋流水鳴濺濺。欲尋梅花作一笑。數枝忽到拄杖邊。高標元合著山澤。絕豔豈復施

丹鉛。定知曾授餐玉法。不爾恐是凌波仙。錦江賦詩忽萬里。蓬山把酒今三年。相逢風味宛如昨。人生何

者非前緣。頗思取醉極清賞。杖頭幸有百許錢。但判插破烏紗帽。莫記吹落黃金船。

趣極自然，調亦清婉。

題四仙像原註：蘭子訓

世上年光東逝波。咸陽銅狄幾摩挲。神仙不死成何事。只向秋風感慨多。

陸游

冬晴開步東村由故塘還舍作

紅藤拄杖獨相羊。路遠東村小嶺傍。水落枯萍粘蟹殼。原註鄉人植竹以取蟹謂之日殼雲開寒日上魚梁。洛陽二頃言

良是光範三書計本狂。歷盡危機識天意。要令閑健返耕桑。

方回曰五六善用事蟹殼句尤新

盧世淮曰瑣事寫來亦新緻

祖應世曰一路細細領畧淺躁人安能有此

### 夜聞湖中漁歌

夢回一燈翳復明。臥聞湖上漁歌聲。嗚嗚乍依忽更起。孌孌欲斷還微縈。初隨缺月墮煙浦。已和殘角吹江城。悲傷似擊漸離筑。忠憤如撫桓伊箏。放臣萬里憂國淚。戍客白首懷鄉情。峽猿失侶方獨宿。沙雁垂翅猶遐征。巴巫竹枝短亭晚。瀟湘欸乃孤舟橫。世間此恨故相似。使我百感何由平。一氣排宕有風雨驟至之勢。只用一語收結。老氣無敵。

### 村夜

寂寂山村夜。悠然醉倚門。月昏天有暈。風軟水無痕。迹為遭讒遠。身由不仕尊。敢嗟車馬絕。同社自雞豚。潘問奇曰風軟水無痕未經人道

### 野意

隄長逾十里。村小只三家。山客弛樵擔。溪翁鳴釣車。花深迷蝶夢。雨急散蜂衙。衰疾新年減。青巖上若耶。

### 憶昔

憶昔西征日。飛騰尚少年。軍書插鳥羽。戍壘候狼煙。渭水秋風夜。岐山曉雪天。金鞮馳叱撥。繡袂舞嬋娟。



但恨功名晚。寧知老病纏。虎頭空有相。麟閣竟無緣。壯士埋巴峽。原註獨孤策孤身臥海壖。安西九千里。孫武十三篇。裘嘆蘇秦敵。鞭憂祖逖先。何時聞詔下。遣將入幽燕。筆力健舉。

感懷

卜居鏡湖上。一卷環翠屏。竹林藏硤劄。嶺路蟠青冥。鸞騰立奇石。斬絕瞻危亭。車馬雖埽迹。猿鳥與忘形。我行半九州。竭盡芒屨青。豈知雲滿鬢。於茲做雲局。丹砂收箭鏃。茯苓斲人形。遑天渺歸鶴。一瞬三千齡。殘年迫衰謝。嬰疾歸鄉枌。諸賢渡江初。總角幸有聞。才非楚倚相。亦能讀典墳。夫豈或使之。後死與斯文。世儒鑿戶牖。道術將瓜分。孤陋守一說。百次殆可焚。後來豈無人。真聖誰揮斤。巍巍貞觀治。房魏出河汾。文集答劉主簿書。前輩之學積小以成大。以所有易所無。以能問於不能。故其久也。汪洋浩博。該極百家。而不可涯涘。諸名勝渡江去。前輩尚未甚遠。故此風猶不墜。三二十年來。士自為哇吟。甚狹。已所未知者。輒訕薄之。以為不足學。詎窮經者則曰傳註已盡矣。詎博學者則曰不知無害為君子。嗚呼。陋哉。



御選唐宋詩醇卷之四十六

山陰陸游詩五

東村散步有懷張漢川

扶杖村東路。秋來始此回。寒鴉盤陣起。野菊臥枝開。憂國丹心折。懷人雪鬢催。房湖八千里。那得尺書來。

將軍行

將軍入秦平燕策。持笏榻前親指畫。天山熱海在目中。下殿即日名烜赫。馳出都門雪初霽。直過黃河水。未圻繡旗方掠桑乾渡。羽檄已入金臺陌。勇士如鷹健欲飛。虜王似兔何勞擗。戎服押俘獻廟社。正衙第賞頒詔冊。端門賜酺。天下慶御觴。尚恨滄溟迤。從來文吏喜相輕。聊遣濡毫書竹帛。

古別離

孤城窮巷秋寂寂。美人停梭夜歎息。空園露濕荆棘枝。荒蹊月照狐狸迹。憶君去時兒在腹。走如黃犢翁未識。紫姑吉語元無據。况憑瓦兆占歸日。嫁來不省出門前。魂夢何因識酒泉。粉黛磨鏡不忍照。女子感時無十年。

詞意俱老絕去模擬之迹而與古為化

望夫石

送君遠成交河北。男兒自以身許國。不能彎弓騎惡馬。欲隨君去何由得。登山矯首西北雲。形容雖變心猶存。月明夜夜照淚痕。鐵心石腸輸與君。

不煩刻劃而意已獨至

古別離

君北遊司并我南適熊湘邂逅淮陰市。共飲官道傍。丈夫各有懷。窮達詎可量。臨別一取醉。浩歌神激揚。動業有際會。風雲正蒼茫。亂點劍鋒血。苦寒芒履霜。死即萬鬼鄰。生當致虞唐。丹雘不須盟。我非兒女腸。構思深出語。警不獨摩沆花之壘。亦魚入青蓮之室。

偶懷小益南鄭之間悵然有賦

西成梁州鬢未絲。岷山漾水幾題詩。劍分蒼石高皇迹。原註岷山廟傍有高巖擁朱門老子祠。原註三泉。皇試劍石中分如截巖。君洞景起幽遠燒兔驛亭微雪夜。騎驢棧路早梅時。登臨不用頻悽斷。未死安知無後期。

欲出遇雨

東風吹雨惱遊人。滿路新泥換細塵。花睡柳眠春自嬾。誰知我更嬾如春。

我更嬾如春五字新鮮

看鏡

凋盡朱顏白盡頭。神仙富貴兩悠悠。胡塵遮斷陽關路。空聽琵琶奏石州。

七十衰翁臥故山。鏡中無復舊朱顏。一聯輕甲流塵積。不為君王成玉關。原註馬正惠公喜功名每曰幸未甚衰若有邊警願預征行得

良馬數足輕甲一聯足矣

盧世淮曰少陵勳業頗看鏡彼簡而鏡此盡而暢

夜分不寐起坐園中至旦

涼氣蘇衰疾。幽情入杖藜。月驚孤鶴走。天帶眾星西。松菊今彭澤。清吟殊未愜。喔喔已晨雞。

領聯對句似奇語道出正可一粲等閒言語變瑰奇殆謂是耶

步至湖上寓小舟還舍

病墮支離境。開尋漫浪遊。湖平天鏡曉。山峭石帆秋。賒酒家家許。看花處處留。歸途倦扶杖。却上釣魚舟。  
登履謠寄李長少卿

庭樹非不榮。霜實萬葉枯。朋友豈我棄。漸遠勢自疏。中夜起太息。發篋覓舊書。塵昏蠹蝕損。行缺字欲無。  
一讀色已變。再讀涕淚濡。卷書置篋中。寧使飽蠹魚。

悶極有作

貴已不如賤。狂應又勝癡。新寒壓酒夜。微雨種花時。堂下藤成架。門邊枳作籬。老人無日課。有興即題詩。

三峽歌

乾道庚寅。予始入蜀。上下三峽屢矣。後二十五年。歸耕山陰。偶讀梁簡文巴東三峽歌。感之擬作。

十二巫山見九峯。船頭彩翠滿秋空。朝雲暮雨渾虛語。一夜猿啼明月中。

我遊南賓春暮時。蜀船曾繫挂猿枝。雲迷江岸屈原塔。花落空山夏禹祠。

取境清絕一洗陽臺憤語為巫山生色

贈道流

憶在長安爛漫遊。大明宮闕與雲浮。今朝偶上慈恩塔。北望芒芒禾黍秋。  
原註唐舍元殿與慈恩塔南北相直

贈道流而及此益自性情流出者

三盃兀兀復騰騰。服氣燒丹總不能。借問生涯在何許。孤舟風雨伴漁燈。

艾如張

錦膺繡羽名山雞。清泉可飲林可栖。稻梁滿野葉不啄。雖有奇禍無階梯。東村西村煙雨晚。蕭艾離離林薄淺。翩然一下駭機發。汝雖知悔安能免。漢家天子南山下。萬騎合圍窮日夜。犬牙鷹爪死不辭。觸機折

頸吁可悲。

寓意深至意凡三折李賀作不能及也。

郊行夜歸書觸目

老翁病起厭端居。隨意東西不問途。霜野草枯鷹欲下。江天雲濕雁相呼。空垣破竈逃租屋。青帽紅燈賣酒墟。未畏還家踏泥潦。園丁持炬小兒扶。

歲暮感懷

我家釋耒起。遂自東封前。詩書守素業。蟬聯二百年。長老日零落。念之心惕然。每恐後生輩。或為利欲遷。我少亦知學。蹭蹬及華顛。訟過豈不力。壽非金石堅。我壯已早衰。晨鏡每惆悵。藥物姑自持。耆老曷敢望。造物有乘除。貧悴博無恙。歸鄉更多感。朋舊盡彫喪。客來多避席。謂我丈夫行。此意詎敢忘。報子以直諒。士生始志學。固為聖人徒。人人可稷卨。世世皆唐虞。仰事與俯育。治道無絕殊。孔孟之所傳。世俗顧謂迂。申韓尚刻薄。老莊競虛無。爾車非不良。益行九軌途。在昔祖宗時。風俗極粹美。人材兼南北。議論忘彼此。誰令各植黨。更仆而迭起。中更夷狄禍。此風猶未已。臣不難負居。生者固實死。儻窳太平基。請自厚俗始。學有根柢。故體製肅括。意旨宏深。大家風力。非徒事吟咏者流也。

文集論選用西北士大夫。劉子天聖以前多取北人。南方士大夫沈抑者多。仁宗照知其弊。公聽並觀。兼收博採。無南北之異。及紹聖學宦間。取南人更多。而北方士大夫復有沈抑之歎。陳瓘獨見其弊。昌言於朝曰。重南輕北。分裂有萌。嗚呼。瓘之言天下之至言也。

山園雜詠

殘春終日在林亭。散髮披衣醉復醒。科斗已成鼃閣閣。櫻桃初結子青青。魚遊滄海宜濡沫。禽慕雕籠即  
翦翎。薄晚東風吹小雨。笑攜長鏡伴畦丁。  
意雖刻露語自新穎

雨夜書感

宦遊四十年。歸逐桑榆暖。皇恩念黎老。一官猶置散。春殘桃李盡。風雨閉空館。有懷無與陳。萬事付酒椀。  
近代固多賢。吾意終不滿。可憐杜拾遺。冒死明房館。慷慨詎非奇。經綸恨才短。羣胡穴中原。令人歎微管。  
以古喻今當為張浚而發。本傳云言者論游力說張浚用兵免歸則浚之罷游未必不為之言。故以甫之  
救瑄自比浚之與瑄。瑄事如一富平再敗與陳陶青坂何以異。詩深歎其才短固不誣也。

春晚雜興

池面萍初紫。牆頭杏已青。鴛兒撐小艇。留客坐孤亭。相法無侯骨。生年直酒星。正須遺萬事。莫遣片時醒。  
方回曰留客坐孤亭。雖非奇句。却極有味。五六亦新異。

夜歸

疏鐘渡水來。素月依林上。煙火認茅廬。故倚船篷望。

妙語似玉融江臯曲

三月十一日郊行

到處人家可乞漿。槐陰卷陌午風涼。水波漫漫新秧綠。山壠離離大麥黃。父子力耕春漸老。婦姑共績夜  
猶長。堯民擊壤雖難繼。芹美懷君未敢忘。

路傍曲

淒涼路傍曲。朱門人不知。秋街黃葉落。正是斷腸時。

秋夜

燈欲殘時酒半消。斷碁疏雨共無憐。老來萬事渾非昔。惟有詩情似灞橋。

舍北晚眺

紅樹青林帶暮煙。並橋常有賣魚船。樊川詩句營邱畫。盡在先生拄杖邊。

自然入畫

初冬感懷

落葉掃還積。斷鴻飛更鳴。羸軀得霜健。老眼向書明。水瘦河聲壯。萁枯馬力生。竟為農父死。白首負功名。

聞雁

霜高木葉空。月落天宇黑。哀哀斷行雁。來自關塞北。江湖稻粱少。念汝安得食。蘆深洲渚冷。歲晚霰雪逼。

不知重雲外。何處避畢弋。我窮思遠征。羨汝有羽翼。

意入風騷格。逼漢魏與杜陵。相當真乃不復多讓。

枕上偶成

放臣不復望修門。身寄江頭黃葉村。酒渴喜聞疏雨滴。夢回愁對一燈昏。河潼形勝寧終棄。周漢規模要

細論。自恨不如雲際雁。南來猶得過中原。

舍北關望作六字絕句

潘岳一篇秋興。李成八幅寒林。舍北偶然倚杖。盡見古人用心。



善書似真以對面取之用意微妙

雨夜有懷張季長少卿

放翁雖老未忘情。獨臥山村每自驚。鼎鼎百年如電速。寥寥一笑抵河清。梅初破。鶯行江路。燈欲成。花聽雨聲。正用此時思劇飲。故交零落愴餘生。

潘問奇曰河清如此用形容殊苦

客言來自上峽道中以其語作一絕

日曬霜融作淺泥。酒家卻在斷橋西。五陵今代無豪傑。獨臥茅簷聽午雞。

殘臘

殘臘無多日。吾生又一年。林塘明夕照。墟落淡春煙。山色危欄角。梅花綠酒邊。歲時元自好。老病獨悽然。

懷舊

翠崖紅棧鬱參差。小益初程景最奇。誰向毫端收拾得。李將軍畫少陵詩。

張完臣曰又是一蜀道佳話

幽居初夏

湖山勝處放翁家。槐柳陰中野徑斜。水滿有時觀下鷺。草深無處不鳴蛙。籜龍已過頭番筍。木筆猶開第一花。歎息老來交舊盡。睡餘誰共午甌茶。

寫得幽字意出

潘問奇曰頸聯對句更勝

晨起

齒豁不可補。髮脫無由栽。清晨明鏡中。老色蒼然來。餘年亦自惜。未忍付酒杯。抽架取我書。危坐闔復開。萬世見唐堯。夔龍獲親陪。寥寥三千年。氣象挽可回。豈以七尺軀。顧受世俗衰。道在無不可。廊廟均蒿萊。約旨植義真。力彌滿清晨。十字亦有蒼然之氣。

六月二十四日夜分夢范至能李知幾尤延之同集江亭諸公請予賦詩記江湖之樂詩成而覺忘數字而已

露著霜筠織短篷。飄然來往淡煙中。偶經菱市尋谿友。卻揀蘋汀下釣筒。白菌蓄香初過雨。紅蜻蜒弱不禁風。吳中近事君知否。團扇家家畫放翁。

風雅自賞夢中亦應得意五六調新采麗淺薄者議其未穩真可一噓

### 題韓蓮鹽竹隱堂絕句

塵埃車馬日駸駸。誰解從君一散襟。待我清秋有閑日。抱琴來寫萬龍吟。

### 舟中詠落景餘暉輕橈弄溪渚之句蓋孟浩然耶溪泛舟詩也因其句為韻賦詩

獨鶴還故鄉。歸然但城郭。出門無與遊。所致苦寂寞。裹飯事幽討。此計殊不惡。薄暮宿漁家。蒼煙帶墟落。維舟入谷口。信步造異境。隔籬雞犬聲。滿地梧楸影。瓦甑炊香稻。石泉汲新井。人間苦偏仄。愛此須臾景。老圃髮如霜。見客能廢鋤。與坐使之年。自云八十餘。老身六朝民。草舍數世居。力守遠祖言。一字不學書。沿溪得茅店。酒旗出柴荆。杖頭錢已空。一醉何由成。主人語鄭重。手把甕面清。勸我姑小留。溪魚亦可烹。秦皇酒甕邊。古有釣魚磯。我來必竟日。時挈雙鯉歸。白鷺真可人。常先孤棹飛。高詠江練句。令人憶元暉。鏡湖三百里。風止鏡面平。持以照吾心。俗塵安得生。散髮鷗鷺間。萬事秋毫輕。誰能拂東絹。寫我孤舟橫。朝發雲根寺。暮宿煙際橋。冷螢濕不飛。潛魚驚自跳。菱歌晨晨。荻浦風蕭蕭。平明宿鳥起。我亦理歸橈。

古祠照滄波。老木闕雲洞。輕舟不搖櫂。正用一風送。汲井漱甘液。掃榻寓幽夢。所恨山未深。城笳聽三弄。禹穴探斷簡。樵風泛清溪。倒影森松桂。避船散鳧鷖。塵中有異境。十里青玻瓈。高塔忽招人。湖邊日未低。溪行已清秋。還舍尚殘暑。天公為解圍。簾櫳過疏雨。青蔬喜小摘。紅粒亦新杵。一飽坐北軒。蘋花泣煙渚。作者詩以萬計。閑適之什。往往出之。率易亦復數見。不鮮。沙中金屑。每苦難披。十詩直舉胸情。清真古澹。妙處在神味之間。不可以貌求之。

秋夜紀懷

北斗垂蒼蒼。明河浮太清。風林一葉下。霜草百蟲鳴。病入新涼減。詩從半睡成。還思散關路。炬火驛前迎。方回曰：中四句語意至工。

舍北搖落景物殊佳偶作

屋角成金字。溪流作縠紋。斜通小橋路。半掩夕陽門。孤艇衝煙過。疏鐘隔塢聞。杜門非獨病。實自厭紛紛。方回曰：放翁此題凡五首。所謂筆端有口。新冬景物搜抉無遺。屋角成金字。本出北史斛律金傳。以對溪流作縠紋亦奇。

夜坐

杳杳霜鐘十里聲。娟娟江月半窗明。陳編欲絕猶堪讀。微火相依更有情。九曲煙雲新散史。原註時方被命再領武夷祿百年鉉熟老諸生。頽然待旦君無笑。尚勝聞雞賦早行。原註溫岐詩云雞聲茅店月人逐板橋霜蓋唐人早行絕唱也

隴頭水

隴頭十月天雨霜。壯士夜挽綠沈槍。臥聞隴水思故鄉。三更起坐淚數行。我語壯士勉自強。男兒墮地志四方。裹尸馬革固其常。豈若婦女不下堂。生逢和親最可傷。歲華金絮輸胡羌。夜視太白收光芒。報國欲

死無戰場。

有古直悲涼之氣。

書志

往年出都門。誓墓志已決。況今蒲柳姿。俛仰及大耋。妻孥厭寒鐵。鄰里笑迂拙。悲歌行拾穗。幽憤臥齧雪。千歲埋松根。陰風蕩空穴。肝心獨不化。凝結變金鐵。鑄為上方劍。蒙以佞臣血。匣藏武庫中。出參髦頭列。三尺聚星辰。萬里靜妖孽。君看此神奇。醜虜何足滅。幻想奇文不可磨滅。

書憤

白髮蕭蕭臥澤中。祇憑天地鑒孤忠。泥窮蘇武餐羶久。憂憤張巡嚼齒空。細雨春燕上林苑。頽垣夜月洛陽宮。壯心未與年俱老。死去猶能作鬼雄。

方回曰悲壯感慨不當徒以虛語視之

鏡裏流年兩鬢殘。寸心自許尚如丹。衰遲罷試戎衣窄。悲憤猶爭寶劍寒。遠戍十年臨的博。壯圖萬里戰皋蘭。關河自古無窮事。誰料如今袖手看。

小舟遊西涇度西岡而歸

小雨重三後。餘寒百五前。聊乘瓜蔓水。閑泛木蘭船。雪暗梨千樹。煙迷柳一川。西岡夕陽路。不到又經年。穩巾帶秀此境正不易到

王復禮曰較太白梨花千樹雪楊柳萬條煙似勝一籌但水衡記以五月為瓜蔓水此屬一時誤用

春行

九日春陰一日晴。強扶衰病此閑行。猩紅帶露海棠濕。鴨綠平隄湖水明。原註杜子美晚看紅濕處花重濕字明字可謂奪造化之功世未有拈出者酒賤柳陰逢醉臥。土肥稻壟看深耕。山翁莫道渾無用。解與明時說太平。

閑身

炊煙漠漠閉柴荆。聊用閑身答太平。重碧飛觴心未老。硬黃臨帖眼猶明。吳鱉滿箔含桃熟。瓏麥登車棹棹鳴。補劓息黥今有地。問君何處用虛名。

舍北行飯書觸目

落雁昏鴉集遠洲。青林紅樹擁平疇。意行舍北三叉路。閑看橋西一片秋。小婦破煙撐去艇。了童橫笛喚歸牛。形容野景無餘思。自怪癡頑不解愁。

盧世確曰先寫景而後人事句句宛肖

雪夜感舊

江月亭前棹燭香。龍門閣上默聲長。亂山古驛經三折。小市孤城宿兩當。晚歲猶思事鞍馬。當時那信老耕桑。綠沉金鎖俱塵委。雪灑寒燈淚數行。

調極清和領聯斷句工緻可愛

吳喬曰放翁壯時有志經世故有晚歲猶思事鞍馬當時那信老耕桑之句

雜感

志士山棲恨不深。人知已是負初心。不須先說嚴光輩。直自巢由錯到今。故舊書來訪死生。時聞剝啄叩柴荆。自嗟不及東家老。至死無人識姓名。

蘭

南巖路最近。飯已時散策。香來知有蘭。遽求乃弗獲。生世本幽谷。豈願為世娛。無心託階庭。當門任君鋤。為幽人寫照。寓意深遠。作者別調。

感懷

夜涉南沮水。朝過小益城。梯山天一握。度棧土微平。雨近秦雲暗。霜高隴月明。至今孤夢裏。鳴馬有遺聲。

原註鳴馬皆七字韻語聞之悲愴動人

凜凜隆中相。臨戎遂不還。塵埃出師表。草棘定軍山。壯氣河潼外。雄名管樂間。登堂拜遺像。千載愧吾顏。我思杜陵叟。處處有遺蹤。錦里瞻祠柏。綿州弔海棕。蹉跎悲應驥。感會失雲龍。生世後斯士。吾將安所從。游久居蜀地。於孔明子美。企想獨深二。詩渾成老健。蓋程形賦音。與其人相稱也。

露坐原註立秋前五日

旋削甘瓜進酒卮。斷雲漠漠斗離離。北臨積水風來壯。東恨長林月上遲。秋近不堪聞急杵。夜涼已復怯輕絺。天孫老抱河梁恨。豈獨人生事可悲。

新秋

殘暑無多日。幽居近小江。酒醒中夜起。松月入山窗。秋風昨夜來。聲滿梧桐樹。故人渺天末。此夕誰與度。妙語得自直。尋亦清晨登隴首。明月照積雪之比。

秋夕露坐作

銀河半落露華清。南斗闌干北斗明。冉冉方悲老將至。纖纖又歎月初生。酒牀細滴香浮瓮。衣杵相聞聲。

滿城萬卷讀書無用處。卻將耕稼報昇平。

感秋

秋色關河外。秋聲天地間。壯士感此時。朝鏡彫朱顏。一身寄空谷。萬里夢天山。噫嗚怒皆裂。憤激悲涕潛。古來真龍駒。未必置天閑。長松倒澗壑。委棄同養菅。得志未可測。談笑濟時艱。凜然出師表。一字不可刪。

新涼

菰首初離水。蘆芽淺漬糟。稊香等炊玉。韭美勝炮羔。露下殘蕪濕。風生萬木號。從今更何事。痛飲讀離騷。

豐歲

豐歲歡聲動四鄰。深秋景氣聚如春。羊腔酒擔爭迎婦。鼙鼓龍船共賽神。處處喜晴過甲子。家家築屋趁庚申。老翁欲伴鄉閭醉。先辦長衫紫領巾。

點綴娉媚煞有風致

小舟過吉澤效王右丞

澤國霜露晚。孤村煙火微。本去官道遠。自無人迹稀。木落山盡出。鐘鳴僧獨歸。漁家閑似我。未夕閉柴扉。不必似王自饒清致

文集跋王右丞集余年十七八時讀摩詰詩最熟今永晝再取讀之如見舊師友恨閒闊之久也

秋晴見天際飛鴻有感

新晴天宇色正青。羣鴻高蹇在冥冥。兒童相呼共仰視。我亦扶杖來中庭。豐年到處稻梁滿。胡不暫下栖沙汀。應須江海寄曠快。肯為霜雪噉飄零。書生可笑不自喜。憔悴久翦籠中翎。鷗波萬里每媿杜。鶴化千載知非丁。風前哀號漫激烈。月下孤影常玲竚。詩成欲寫復懶去。誦似溪友聲冷冷。

遣調流麗曲盡心手之妙

戊午重九

朋舊相望天一涯。登高結伴只鄰家。秋風自欲吹紗帽。衰鬢曾泥菊花。藥市神仙思益部。餓盤節物記京華。自憐病後歡悵薄。小醉歸來日未斜。

舟中

施邊潮水落還生。篷底寒燈滅復明。約束長年牢繫纜。報人風雨有鼉鳴。

不必有奇即事自佳

蕭蕭風雨小江秋。不是愁人亦合愁。忽聽疏鐘知寺近。笑尋沙路上牛頭。

冬日感興十韻

霧雨天昏曠。波湖地阻深。蔽空鴉作陣。暗路棘成林。有客風埃裏。頻年老病侵。夢魂來二豎。相法欠三壬。舊憤開孤劍。新愁感斷砧。唐衢惟痛哭。莊鳥正悲吟。瘦跨秋門馬。寒生夜店衾。但思金舊壁。敢冀訪遺簪。樓上蒼茫眼。燈前破碎心。長謔傾濁酒。慷慨壓層陰。

巷中晨起書觸目

暉暉初日上簾鉤。漠漠清寒透衲裘。雪棘並棲雙鷓鴣。金環斜絆一猿愁。廉宣臥壑松楠老。王子穿林水石幽。戲事自憐除未盡。此生行欲散風漚。原註唐希雅畫鷓鴣易元吉畫猿廉宣仲老水王仲信水石皆巷中所挂小軸

設色妍麗似晚唐人佳句

春日小園雜賦

市塵不到放翁家。繞麥穿桑野徑斜。夜雨長深三尺水。曉寒留得一分花。悶從鄰舍分春甕。閒就僧窗試



露芽自此年光應更好。日驅秧馬聽縑車。  
夜雨一聯鬆秀可愛。

沈園

城上斜陽畫角哀。沈園非復舊池臺。傷心橋下春波綠。曾是驚鴻照影來。

張完臣曰寫得幽豔動人

夢斷香消四十年。沈園柳老不吹綿。此身行作稽山土。猶吊遺蹤一泣然。

張完臣曰又深一步其痛愈深

紹興郡刻本題下注此放翁憶其前妻作也。妻以失歡於姑被遣。後於沈園見之。未幾下世。翁再遊此地。追感賦詩。凄苦不忍多讀。

讀晉書

諸公日飲萬錢厨。人乳蒸豚玉食無。誰信秋風雒城裏。有人歸棹為蓴鱸。  
不著議論而指意躍然咏史上乘。

春晴自雲門歸三山

乍行春野眼增明。漸減春衣體倍輕。人賣山茶先穀雨。鴉隨墻祭過清明。柳塘水滿雙鳧戲。稻隴泥深一犢行。晚到三橋泛舟去。掩關不復畏重城。

夜聞姑惡

湖橋東西斜月明。高城漏鼓傳三更。釣船夜過掠沙際。蒲葦蕭蕭姑惡聲。湖橋南北烟雨昏。兩岸人家早開門。不知姑惡何所恨。時時一聲能斷魂。天地大矣汝至微。滄波本自無危機。秋菰有米亦可飽。哀哀如

此將安歸

讀前輩詩文有感

我無前輩千鈞筆。造物爭功謝不能。已分文章歸委靡。可憐意氣尚憑陵。鸞旗廣殿晨排仗。鐵馬黃河夜踏冰。此事要須推大手。蟬嘶分付與吳僧。巧構形似之言。要非詣力所臻。不能道來親切。乃爾

讀隱逸傳

終南處士入都門。少室山人補諫垣。畢竟只供千載笑。石封三品鶴乘軒。不以議論傷格律。比勘亦自允協

秋陰

淡日披朝露。輕雲結暮陰。菰蒲溪露暗。松竹草堂深。妙墨雙鈎帖。奇聲百衲琴。古人端未遠。一笑會吾心。

秋懷

皇天本無心。萬物各有時。飛鴻何預人。南翔每如期。仰看霜露墜。俯數草木衰。英英籬下菊。秀色獨滿枝。豈無一樽酒。相與斟酌之。耄老天所佚。行歌復何疑。改朔甫再宿。月見西南隅。纖纖一銀鈎。挂空疑有無。我行青楓岸。遠水浮雙鳧。新寒入短衣。感此風霜初。頗歛呼小艇。東村行羊區。衣薄且言歸。煙火望吾廬。閑淡有味

秋思

日落江城聞擣衣。長空杳杳雁南飛。桑枝空後醅初熟。豆莢成時兔正肥。徂歲背人常冉冉。老懷感物倍

依依平生許國今何有。且擬梁鴻賦五噫。

冬晴與子坦子聿遊湖上

海山山下百餘家。垣屋參差一帶斜。我欲往尋疑路斷。試沿流水覓桃花。

齋中弄筆偶書示子聿

左右琴樽靜不譁。放翁新作老生涯。焚香細讀斜川集。候火親烹顧渚茶。書為半酣差近古。詩雖苦思未名家。一窻殘月呼愁起。裊裊江城咽暮笳。

少陵云語不驚人死不休。放翁云詩雖苦思未名家。文人之豪。故自各有著力處。令人未涉其境而漫以雕琢直率置之可乎。

祖應世曰放翁七律無一字效襲四唐而獨開蹊徑。別有一天。何嘗寄人籬下。

陳訥曰昔蘇長公教人作詩曰字字覓奇險。節節累枝葉。又曰法度法前軌。後山亦云要當攻石堅。勿作搏沙散。放翁詩至萬首。疑其無復持擇。而改詩鍊句。每形篇什。數公之於詩。亦列子之御風而行。靈均之桂舟玉車也。而其言顧如此。

夢中作遊山絕句

霜風吹帽江村路。小蹇迢迢委轡行。忽到雲山幽絕處。穿林唬鳥不知名。

北望感懷

榮河溫洛帝王州。七十年來禾黍秋。大事竟為朋黨誤。遺民空歎歲時遒。乾坤恨入新豐酒。霜露寒侵季子裘。食粟本同天下責。孤臣敢獨廢深憂。

有名論非尋常所及

人日東園

歲首未入春。風氣已稍和。我睡意慵起。如此鳴禽何。駕言之東園。落梅亦已多。江南無堅冰。綠池生微波。挹彼蒲萄醕。酌我鸚鵡螺。雖無絲與竹。倚樹自高歌。矯首東南望。稽山鬱嵯峨。兒曹幸力穡。老子得婆娑。

枕上作

山雨蕭蕭過。沙泉咽咽流。夢中無遠道。醉裏失孤愁。貧賈相如騎。寒思季子裘。兒童報新霽。裏飯出閑遊。夢中無遠道。五字亦未經。人道游又有。白云夢移鄉國近。則更奇矣。

長干行

裙腰綠如草。衫色石榴花。十二學彈箏。十三學琵琶。寧嫁與商人。夫婦各天涯。朝朝問水神。夜夜夢三巴。聘金雖如山。不願入侯家。郭袖庭花下。東風吹鬢斜。

小橋

漠漠輕陰隱隱雷。石榴半落點莓苔。小橋西北闌干角。獨岸綸巾待雨來。

觀畫山水

古北安西志未酬。人間隨處送悠悠。騎驢白帝城邊雨。挂席黃陵廟外秋。大網截江魚可膾。高樓臨路酒如油。老來無復當年快。聊對丹青作臥遊。

潘問奇曰。領聯渾成雄健。在此老又為一種。

示友

道向虛中得。文從實處工。凌空一點上。赴海百川東。氣骨真當勉。規模不必同。人生易衰老。君等勿恩慙。

十月

十月霜侵李子裘。吾詩又送一年秋。風回斷續聞樵唱。木落參差見寺樓。久已浮雲看富貴。固應華屋等山邱。江邊海際多幽致。擬跨青螺處處遊。集中有木落寺樓高之句。與此領聯各有佳致。

梅花

春信今年早。江頭昨夜寒。已教清徹骨。更向月中看。

對酒戲詠

淺傾西國蒲萄酒。小嚼南川豆蔻花。更拂烏絲寫新句。此翁可惜老天涯。

盧世淮曰雋麗不可名狀

先少師宣和初有贈晁公以道詩云奴愛才如蕭穎士。婢知詩似鄭康成。晁公大愛賞。今逸全篇。偶讀晁公文集。泣而足之。

任不逢時勇退耕。閉門自號景迂生。遠聞佳士輒心許。老見異書猶眼明。奴愛才如蕭穎士。婢知詩似鄭康成。早孤遇事偏多感。欲續殘章涕已傾。

追感往事

諸公可歎善謀身。誤國當時豈一秦。不望夷吾出江左。新亭對泣亦無人。

千年而後如聞歎。息之聲善謀身一言九中庸。臣病根

潘問奇曰此詩雖欠含蓄。然亦可知南渡後雖周伯仁亦難得

文集跋呂侍講歲時雜記年運而往士大夫安於江左求新亭對泣者正未易得撫卷累欷

御選唐宋詩醇卷四十六

Blank page with a double-line border. Faint vertical text is visible in the center, likely bleed-through from the reverse side of the page.

御選唐宋詩醇卷之四十七

山陰陸游詩六

春遊

春風堤上草萋萋。草軟沙平護馬蹏。似蓋微雲繞障日。如絲細雨不成泥。千秋觀裏逢新燕。九里山前聽  
午雞。追憶舊遊愁滿眼。綵船曾繫畫橋西。

三月二十日兒輩出謁孤坐北窗

園林春已空。波港雨新足。泥深黃犢健。桑老紫椹熟。豐年逋負少。村社饜酒肉。微風吹醉醒。起和飯牛曲。  
樸直有味

西村

亂山深處小桃源。住歲求漿憶叩門。高柳殘橋初轉馬。數家臨水自成村。茂林風送幽禽語。壞壁苔侵醉  
墨痕。一首清詩記今夕。細雲新月耿黃昏。

湖塘晚眺

綠樹暗村墟。青山繞草廬。奉祠神禹舊。馳道暴秦餘。浦色沈煙網。蛙聲入雨鉏。清秋又如許。幽憤若為  
癒。病起閑無事。時來古渡頭。煙中賣魚市。月下采蓮舟。帆鼓娥江晚。菱歌越廟秋。長吟無傑句。聊以散吾  
愁。氣體高妙在。盛中之間。

秋夜

老病睡眠少。如斯秋夜何。長庚未醜月。織女已斜河。莎徑蟲吟苦。柴門葉落多。誰知窮甯戚。不作飯牛歌。  
漁父

千錢買一舟。百錢買兩漿。朝看潮水落。暮看潮水長。持魚換鹽酪。縣郭時下上。亦或得濁醪。不復計瓶盎。浩歌忘遠近。醉夢隨蒼蒼。元直不可逢。悠然寄遐想。

梅市

梅市柯山小。繫船開篷驚起醉中眠。橋橫風柳荒寒外。月墮煙鐘縹緲邊。客思況經孤驛路。詩情又入早

秋天如今老。病知何恨。判斷江山六十年。清和宛轉可謂物理俱美情致兼深

盧世確曰是雲林寫景

郭西

鵲下川原黑。船行浦溆空。橋燈搖水影。樓角散天風。野眺飛埃外。漁歌冷翠中。不須嘲病翼。要是脫樊籠。

柳橋晚眺

小浦聞魚躍。橫林待鶴歸。閒雲不成雨。故傍碧山飛。

有手揮目送之趣

秋社

雨餘殘日照庭槐。社鼓琴瑟賽廟回。又見神盤分肉至。不堪沙雁帶寒來。書因忘作鬧終日。酒為治聾醉一杯。記取鏡湖無限景。蘋花零落蓼花開。

村舍

生理嗟彌薄。吾居久未完。蝶飛窗紙碎。龜坏壁泥乾。小雨牛欄濕。微霜碓舍寒。晚禾蟲獨少。鄰里共相寬。

原註今年晚禾苦  
蟲註子鄉獨克



潘問奇曰生初不肯踏襲一字

秋日雜詠

荻蒲風起暮蕭蕭。煙斂林疏見斷橋。白蟹團魚初上市。輕舟無數去乘潮。

竹枝遺調

小立

紅樹圍廬晚。碧花籬落秋。荒波船護鴨。斷岸笛呼牛。酒賤村村醉。山寒寺寺幽。聊須岸烏帽。小立埭西頭。

秋晚湖上

已過西成賽廟期。家家下麥不容遲。夕陽遍野人歸後。秋水生灘鷺集時。靈藥不治懷抱惡。好詩空益鬢

毛衰。從來未識蘇司業。愁絕西風滿酒旗。

結聯善於運化有縹緲之韻

雨後至近村

夜雨曉方止。朝雲猶作陰。山餘一寸碧。溪長半篙深。臥泛白鷗渚。行穿黃葉林。老農能共語。真率會人心。

題嚴州王秀才山水枕屏

我行天下路幾何。三巴小益山最多。翠岸青嶂高嵯峨。紅棧如帶縈巖阿。下有駭浪千盤渦。一跌性命委

蛟鼉。日馳三百一烏驟。雪壓披氈沈滿鞞。驛亭沃酒醉臉酡。長笛腰鼓雜巴歌。大散關上方橫戈。豈料世

變如翻波。東歸輕舟下江沱。回首歲月悲蹉跎。壯君落筆寫岷嶓。意匠自到非身過。偉哉千仞天相摩。谷

裏人家藏綠蘿。使我恍然越關河。熟視粉墨頻摩挲。

鏗然徹耳煥然奪目意。近自到非身過九有妙理。

追憶征西懷中舊事

小檝南山雪未消。繡旗斜卷玉驄驕。不如意事常千萬。空想先鋒宿渭橋。

原註在南鄭時關中將吏有獻此二物者

解嘲

一壑棲遲久。多生習氣消。行藏無媿怍。夢覺兩逍遙。倩鶴傳山信。疏泉洗藥苗。晚來幽興極。乘月過溪橋。

讀史

民間斗米兩三錢。萬里耕桑罷戍邊。常使屏風寫無逸。應無烽火照甘泉。保泰持盈之指。借明皇發之。不落言詮。自近風雅。

遠興

家住城南剡曲傍。門前山色蘸湖光。三朝執戟悲年往。二項扶犁樂歲穰。名姓已隨身共隱。文辭終與道相妨。子孫勉守東臯業。小甑吳粳底樣香。

方回曰五六議論最妙

送子龍赴吉州椽

我老汝遠行。知汝非得已。駕言當送汝。揮涕不能止。人誰樂離別。坐貧至於此。汝行犯胥濤。次第過彭蠡。波橫吞舟魚。林嘯獨脚鬼。野飯何店炊。孤權何岸檝。判司比唐時。猶幸免笞箠。庭參亦何辱。負職乃可恥。汝為吉州吏。但飲吉州水。一錢亦分明。誰能肆饒毀。聚俸嫁阿惜。擇士教元禮。我食可自營。勿用念甘旨。衣穿聽露肘。履破從兒指。出門雖被嘲。歸舍却睡美。益公名位重。凜若喬嶽峙。汝以通家故。或許望燕几。得見已足榮。切勿有所啟。又若楊誠齋。清介世莫比。一聞俗人言。三日歸洗耳。汝但問起居。餘事勿挂齒。

希周有世好。敬叔乃鄉里。豈惟能文辭。實亦堅操履。相從勉講學。事業在積累。仁義本何常。蹈之則君子。汝去三年歸。我儻未即死。江中有鯉魚。頻寄書一紙。

以韻語作訓詞。真情極切。自然成文。樸茂渾堅。大家本領。

正月五日出遊

久作閩人不慣愁。新春天氣更清柔。未為違海千年別。且繼斜川五日遊。細柳拂頭穿野徑。落花黏袖上漁舟。此身定去神仙近。倚遍江南賣酒樓。

初春雜興

水長鷗初泛。山寒茗未芽。深林聞社鼓。落日照漁家。渡遠呼船久。橋傾取路斜。客愁慵遠眺。不是怯風沙。方回曰。八句皆佳。而三四尤古遠。

老病倦遊涉。偶尋溪友期。殘冰擁魚笱。新暖入桑枝。山崦巨然畫。煙村摩詰詩。何人為收拾。媿我不能奇。杜叔高秀才雨雪中相過留一宿而別。誦此詩送之。

久客方知行路難。關山無際水漫漫。風吹欲倒孤城遠。雪落如從野寺寒。暮挈衣囊投士室。晨沾村酒挂驢鞵。文章一字無人識。胸次徒勞萬卷蟠。

用篔字新異可喜

村居書喜

紅橋梅市曉山橫。白塔樊江春水生。花氣襲人知驟暖。鵲聲穿樹喜新晴。坊場酒賤貧猶醉。原野泥深老亦耕。最喜先期官賦足。經年無吏叩柴荆。

別嚴和之

器之魂逝已難招。尚有和之慰寂寥。今夜月明空歎息。想君孤棹泊溪橋。

舟中作

語語無人與遣愁。出門聊復弄輕舟。山穿煙雨參差出。水赴波塘散漫流。隔葉雄雌鳴谷鳥。傍林子母過吳牛。數家清絕如圖畫。炊黍何妨得小留。

盧世灌曰寫景開雅

夏初湖村雜題

嫩日輕風夏未深。曲廊倚仗得閒吟。地偏草茂無人迹。一對芟雞下綠陰。

書直舍壁

道山西下路。杳杳懸重廊。地寂聞傳漏。簾疏有斷香。渠清水馬健。屋老瓦松長。欲出重敲枕。無何覓故鄉。方回曰水馬瓦松詩人罕用此聯可喜

謝韓實之直閣送燈

玉作華星綴絳繩。樓臺交映暮天澄。東都父老今誰在。腸斷當時諫浙燈。

盧世灌曰詩自謝燈意別有在

張完臣曰無限感慨觸物而流

蘇軾諫浙燈劄子伏見中使傳宣下府市司買浙燈四千餘盞。有司且實直以聞陛下。又令減價收買。見已盡數拘收。禁止私買。以須上令。臣始聞之。驚愕不信。咨嗟累日。竊為陛下惜此舉動也。

直舍獨坐思成都

錦城花絮送吳船。屈指東歸又幾年。羣玉峰頭花老矣。百花潭上夢依然。青衫尚記稱狂客。白髮寧知作

老倦所恨酒腸非復昔。閑遊空負杖頭錢。

出東城並江而歸

上車容假寐。出郭當閑遊。遠笛臨風起。高帆到岸收。人歸花市路。客醉酒家樓。徑就東窗臥。孤燈欲話愁。

立春後十二日命駕至郊外戲書觸目

宮雲縹緲漏聲遲。夢裏華胥却自疑。春淺風光先益益。時平節物共熙熙。畫簾不捲聞人語。玉勒徐行避酒旗。閱盡輩流身獨健。恍如隨計入都時。

河橋晚歸

曲巷連新市。層樓近小橋。青帘猶滴雨。綠浦恰通潮。簾影晴方見。笙聲冷未調。斜陽覓歸路。偏愛玉驄驕。筆墨閒有香氣似初唐人佳製

後寓歎

貂蟬未必出兜鍪。要是蒼鷹憶下鞦。彭澤徑歸端為酒。輕舟已老豈須侯。千年精衛心平海。一日於菟氣食牛。會與高人期物外。摩挲銅狄霸城秋。

吳喬曰此當有後進妄生長短如韓君在夷門也

與兒輩泛舟遊西湖一日閒晴陰屢易

逢著園林即款扉。酌泉驚筍欲忘歸。楊花正與人爭路。鳩語還催雨點衣。古寺題名那復在。後生識面自應稀。傷心六十餘年事。雙塔依然在翠微。

寫景最工著語一何娟妙

秋思

烏柏微丹菊漸開。天高風送雁聲哀。詩情也似并刀快。翦得秋光入卷來。

小徑登東山。繚行自西北。至溪上。原註是夕子聿置酒

行穿聲磳度。鈴斫小立風中。客袖斜衰。草雙雙點飛蝶。長空一送栖鷗。荻洲薄暮收魚網。詎舍初寒響。緯車誰道。老人多感慨。未妨尊酒樂年華。

感憤

形勝峭潼在。英豪趙魏多。精兵連六郡。要地控三河。慷慨鴻門會。悲傷易水歌。幾人懷此志。送老一漁蓑。

野興

掃盡紅塵開是非。舍傍好在舊苔磯。壺中春色松肪酒。江上秋風檣葉衣。一片共知雲偶出。千年誰識鶴重歸。勿言野外無供給。雪後連山藥草肥。

五六情事恰合

幽居春晚

老廢攤書病廢詩。晝閑惟與睡相宜。未尋內史流觴地。又近龐公上塚時。花發遊蜂喧院落。筍長馴鹿入藩籬。石帆山下春如許。野老來招不用辭。

盧世灌曰三四從上轉下機軸一貫

閔雨

歲秋固多雨。每恨不及時。黃塵蔽赤日。苗槁已不遲。踏車聲如雷。力盡真何為。天豈不念民。雲族風散之。窮民守稼泣。便恐化棘茨。妻子不望活。所懼尊老飢。我願上天仁。顧哀民語悲。鞭龍起風雲。尚繼豐年詩。

詞旨深厚

書事

北征談笑取關河。盟府何人策戰多。掃盡煙塵歸鐵馬。翦空荆棘出銅駝。史臣歷紀平戎策。壯士遙傳入塞歌。自笑書生無寸效。十年枉是枕瑯戈。

明日復理夢中意作

白盡鬢鬢兩頰紅。頽然自以放名翁。客從謝事歸時散。詩到無人愛處工。高掛蒲帆上黃鶴。獨吹銅笛過垂虹。閑人浪迹由來事。那計猿驚蕙帳空。

劉克莊曰。近歲詩人雜博者。堆垛仗空。疏者窘材料出奇者。費搜索縛律者。少變化。惟放翁記問足以貫通力量。足以驅使才思。足以發越氣魄。足以凌暴南渡而下。故當為一大宗。末年詩云。客從謝事歸時散。詩到無人愛處工。又云。外物不移方是學。俗人猶愛未為詩。則皮毛落盡矣。

舍南野步

枯蔓絡荆籬。幽花映荻扉。馴鷹驚不起。歸鶴倦猶飛。野色連收網。邊愁入搗衣。壯圖空自笑。事事與心違。寫入邊愁一句。便覺情景渾融。通體靈妙。

出遊

山有藍輿步有舟。放翁身健得閑遊。羊牛點點日將夕。蒲柳蕭蕭天正秋。細雨僧歸雲外寺。疏燈人語酒家樓。歸途更愛湖橋月。獨倚闌干為小留。

山行

山光秀可餐。溪水清可啜。白雲映空碧。突起若積雪。我行溪山間。靈府為澄澈。峻嶒崖角立。蟠屈路九折。黃楊與冬青。鬱鬱自成列。其根貫石罅。橫逆相糾結。上捫鷗鷺巢。下壓豺虎穴。流泉不可見。鏘然響環玦。

出山日已暮。林火遠明滅。小憩得樵家。題詩記幽絕。  
不失子美家法。

感昔

白帝城邊鶯亂囀。憶騎瘦馬踏春泥。老來感舊多悽愴。孤夢時時到瀼西。

風雲晝晦夜遂大雨

大風從北來。洶洶十萬軍。草木盡偃仆。道路暝不分。山澤氣上騰。天受之為雲。山雲如馬牛。水雲如魚鼈。朝閣翳白日。暮重壓厚坤。高城岌欲動。我屋何足振。兒怖牀下伏。婢恐堅閉門。老翁兩耳聵。無地著戚欣。夜久不知雪。但覺手足皸。布衾冷似鐵。燒糠作微溫。豈不思一飲。流塵暗空樽。已矣可奈何。凍死向孤村。奇崛

夢華山

古松偃蹇谷谿竒。太華峰前野老家。久客未歸丹竈冷。碧桃八十一番花。

道室

簞過風山第六文。偷然盡謝俗間交。謀生舊買雲三項。託宿新分鶴半巢。露下丹芽生藥瓏。月明金粉落松梢。眉閒喜動君知否。借得丹經手自抄。

鏗然清響殊有仙靈之氣。

倚樓

曲曲闌干縹緲閒。哦詩本欲破除閑。無端又起天涯感。淡墨生綃數點山。

石帆夏日



短棹飄然信所之。茶園漁市到無時。風從蘋末蕭蕭起。月過花陰故故遲。蓴菜煮羹吳舊俗。竹枝度曲楚遺辭。頗聞項里楊梅熟。湊曲相招莫後期。

乙丑夏秋之交小舟早夜往來湖中戲成絕句

橫林渺渺夜生煙。野水茫茫遠拍天。菱唱一聲驚夢斷。始知身在釣魚船。有聲有情迥然高唱

嫩江道上月三更。垣屋參差開月明。倚柂賦詩無傑思。斷腸分付棹歌聲。

懷舊

身是人間一斷蓬。半生南北任秋風。琴書昔作天涯客。蓑笠今成澤畔翁。夢破江亭山驛外。詩成燈影雨聲中。不須強覓前人比。道似香山實不同。

王世貞論詩以樂天放翁為廣大教主。為其情事景物之悉備也。此老情事頗近于美。其意中亦欲與浣花老叟相視而笑。故其自道如此。

春雨

春陰易成雨。客病不驚寒。又與梅花別。無因一倚欄。

梨花

開向春殘不恨遲。綠楊空地最相宜。征西幕府煎茶地。一幅邊鸞畫荔枝。原註宣司靜鎮堂屏上有邊鸞梨花

雜感

春晚晴還雨。村深醉復醒。溪添半篙綠。山可一窗青。藥品隨長鏡。花名記小屏。閑身幸無事。吟嘯送餘齡。

可字雖出唐人自成佳句

出遊歸鞍上口占

渺渺煙波飛翬去。迢迢桑野策驢還。寄懷楚水吳山外。得意唐詩晉帖閒。每惜好春如我老。誰能長日伴人閑。世間自是無兼得。勸業元非造物慳。

初夏閑居

川雲漠漠雨溟溟。濁酒閑傾不滿瓶。蠶簇尚寒憂繭薄。稻陂初滿喜秧青。王師護塞方屯甲。親詔憂民已放丁。病起自憐猶健在。不須求應少微星。

地僻

地僻臨湍瀨。門幽長綠苔。客書疑誤達。僧刺媿虛來。清露蘋花圻。斜陽燕子回。自憐猶有恨。佳日對空臺。何其風秀

耒陽令曾君寄耒譜農器譜二書求詩

歐陽公譜西都花蔡公亦記北苑茶農功最大置不錄。如棄六藝崇百家。曾侯奮筆補多稼。儋州讀罷深咨嗟。一篇秧馬傳海內。農器名數方萌芽。令君繼之筆何健。古今一一辨等差。我今八十歸抱耒。兩編入手喜莫涯。神農之學未可廢。坐使末俗慙浮華。

文獻通考陳氏曰耒譜五卷宣德郎溫陵曾安止移忠撰東坡所謂賦秧馬歌也謂耒譜文既溫雅事亦詳實惜其不譜農器故以此歌附之農器譜三卷續二卷耒陽令曾之謹撰安止之姪孫也追述東坡作歌之意為此編周益公為之序陸務觀亦作詩題其後

夏末野興

半世天涯倦遠遊。還鄉不減旅人愁。數聲相應鳩呼雨。一片初飛葉報秋。山瑞風煙僧院路。河梁燈火酒家樓。絕知雪鬢宜蓑笠。分付貂蟬與黑頭。

訪山家

捨舟步上若耶溪。壽櫟修藤路欲迷。僧院倚山馴栗鼠。野塘灘水下芟雞。草侵古路迢迢遠。雲傍行人故故依。薄暮但尋遺屐去。山家正在鶴巢西。

寄隱士

乳竇寒猶滴。巖扉夜不扃。奇書窺鳥跡。靈藥得人形。浩浩天風積。冥冥海氣清。儻逢王內史。更為乞黃庭。較少陵押形字更新。

春前六日作

夜枕夢回春雨聲。曉窗日出春鳥鳴。典衣沽酒莫辭醉。自有梅花為解醒。贛士曾與宗字光祖以其居贛營谷圖來求詩。

高人心虛萬物宗。家世常以仕易農。買山本愛坡上竹。手種已偃巖前松。瀑泉三伏凜冰雪。谷聲十里酣笙鏞。了知自是一邱壑。不與金精為附庸。原註地與金精山青牛峽為鄰

磊砢多奇宮商悉諧第六句蓋取諸坡仙者

夏日雜題

午夢初回理舊琴。竹爐重炷海南沈。茅簷三日蕭蕭雨。又展芭蕉數尺陰。

西村晚歸

小塢花垂盡。平隄草次迷。日長鶯語久。風定絮飛依。子響聞菴院。舟橫傍釣溪。歸蓬不知處。依約埭東西。古今得意句。難得一聯悉。稱暗牖懸蛛網。不如空梁落燕泥。傍水見寒花。不如出關逢落葉也。田藝衡詩談云。爾如此詩。風定絮飛依五字。亦豈易稱。

雨晴

早曠常思雨。沈陰却喜晴。放船蓮蕩遠。岸隴竹風清。淮浦戎初遁。興州盜甫平。為邦要持重。恐復議銷兵。落葉鳴遙夜。唳蜩送暮秋。不知何許笛。故作此時愁。青海三年戍。黃旗萬里侯。何如石帆下。煙雨釣滄洲。風格道上。故應突過錢郎。

秋夜

累日濃雲作雪不成。遂有春意。釀雪經旬。竟不成一霜。却作十分晴。雲歸油穴。千峰立。暝入郊原。萬耦耕。莒葉離離。豐歲候。梅花眷眷。故人情。道傍孤店。新醅熟。已有幽禽一兩聲。

野望

偶攜一小豎。徙倚望南山。船笛為誰怨。溪雲如我閒。洲長歸雁下。天迴暮鴉還。安得一竿去。終年煙水閒。

春晴

常年春日少春晴。拂面今朝暝吹輕。水閣家家橫小舫。園亭處處聽新鶯。桃花不管詩人老。莒葉空催野叟耕。自笑此生餘幾許。銅駝荆棘尚關情。

思封渭南伯。唐詩人趙嘏為渭南尉。當時謂之趙渭南。後來將以子為陸渭南乎。戲作長句。老向人閒久。倦遊君恩乞。與渭川秋。虛名定作陳驚坐。好句真慙趙倚樓。棧豆十年。盡病馬。煙波萬里著。

浮鷗就封他日輕裘去應過三峰處處留

盧世淮曰欲遜欲任兩意俱有

山行

山鳥啼孤戍。煙蕪空廢亭。戔成波水白。細雨稻秧青。草市少行旅。麓祠多乞靈。最憐投宿處。徹火暮晶荧。

初夏書感

春與人俱老。花隨夢已空。遊蜂黏落蓋。輕燕接飛蟲。桑悴知蠶起。牲肥賽麥豐。為農當自力。相戒勿怱怱。

諸詩皆莫年之作老氣縱橫而格律彌細

對酒作

飲酒豪如卷白波。遺愁難似塞黃河。多聞自解為身累。後死空令見事多。未試神仙餐玉法。且賡壯士入

關歌。此心不道無人識。雪鬢蕭蕭奈老何。

項歲從戎南鄭屢往來與風開暇日追懷舊遊有賦

昔戍蠶叢北。頻行鳳集南。烽傳戎壘密。驛遠客程貪。春盡花猶坼。雲低雨半含。種畬多菽粟。斫木雜松栴。

婦汲惟陶器。民居半草菴。風煙迷棧閣。雷雨起湫潭。城郭秦風近。村墟蜀語參。快心逢曠野。刮目望浮嵐。

考古時興感。無詩日每慚。嘉陵最堪憶。迎馬櫛毵。

方回曰放翁詩出於曾茶山而不專用西江格有晚唐有中唐亦有盛唐此篇雖陳杜沈宋亦不過如

此流麗綿密

異夢

山中有異夢。重鎧奮雕戈。敷水西通渭。潼關北控河。淒涼鳴趙瑟。慷慨和燕歌。此事終當在。無如老死何。

夜坐小飲

零落槐花已滿溝。江湖又見一番秋。冰輪有轍凌空上。銀漢無聲接地流。丹荔甘寒勞遠致。玉醅醇冽喜新莸。移牀坐對西南電。好雨心知不待求。

雜感十首之二

呂釣渭水濱。說築傅巖野。雖曰古盛時。得士益亦寡。天將啟治亂。人才有用舍。向非萬牛力。孰與成大廈。涖泗日已遠。儒術日已喪。學者稱孔墨。為國雜伯王。書生幸有聞。力薄不能倡。默默世俗閒。汝職無乃曠。詞旨宏深雖筆意。微斂却有大篇氣象。

仲秋書事

斷雲歸岫雨初收。茅舍蕭條古渡頭。短褐老人垂九十。松枯石瘦不禁秋。

秋日徙倚門外久之

舍前煙水似瀟湘。白首歸來愛故鄉。五畝田園鬱桑柘。數椽茅屋映菰蔣。翻翻小織船歸郭。渺渺長歌月滿塘。却掩柴荆了無事。篆盤重點已殘香。

聞新雁有感

新雁南來片影孤。冷雲深處宿菰蘆。不知湘水巴陵路。曾記漁陽上谷無。如此寓感亦匪夷所思。

小園獨酌

橫林搖落弄微丹。深院蕭條作小寒。秋氣已高殊可喜。老懷多感自無歡。鹿初離母斑猶淺。橘乍經霜味尚酸。小酌一卮幽興足。豈須落佩與頽冠。

古意

千金募戰士。萬里築長城。何時青塚月。却照漢家營。  
夜泊武昌城。江流千丈清。寧為雁奴死。不作鶴媒生。

工於用古

湖上尋梅

鏡湖渺渺煙波白。不與人閒通地脈。騎龍古仙絕火食。慣往空山鬻冰雪。東皇高之置度外。正似人中巢許輩。萬木僵死我獨存。本來長生非返魂。

小雪湖上尋梅時。短帽亂插皆繁枝。路人看者竊相語。此老胸中常有詩。歸來青燈耿寗扉。心鏡忽入造化機。墨池水淺筆鋒燥。笑拂吳箋作飛草。

仗氣愛奇遂成異境。方回取梅花詩十五篇。殊不逮此。

湖山

坡陀度小嶺。軒豁見平湖。但醉梅花下。民家酒可沽。原註花徑小嶺  
故堞無遺跡。蕭然數十家。茶煙映山起。酒旆傍隈斜。原註古城

雪晴欲出而路澗未通戲作

欲覓溪頭路。春泥不可行。歸來小窻下。袖手看新晴。

春日雜興

行人陌上思悠悠。十里斜陽古渡頭。一片落花無覓處。只教芳草管閑愁。

蘭亭道上

湖上青山古會稽。斷雲漠漠雨淒淒。籃輿晚過偏門市。滿路春泥聞竹雞。  
箭筈弓殘小獵回。壯心自笑未摧摧。前身家近盤閭路。曾看吳王射雉來。  
蘊藉不失唐人風調。

初夏雜興

隱趣與誰論。深居湖上村。避蘭靈改路。惜筍不開園。庭草饒生意。溪沙記漲痕。  
愁來時淺酌。隨事有雞豚。

山行過僧菴不入

垣屋參差竹塢深。舊題名處嬾重尋。茶爐煙起知高興。碁子聲疏識苦心。  
淡日暉暉孤市散。殘雲漠漠半川陰。長吟未斷清愁起。已見橫林宿暮禽。

方回曰詩極高勝。尤有工夫針線。如老杜所謂裁縫減針線迹也。殘雲一聯及末句結乃結煞山行一段餘意前輩詩例如此。須合別有擺脫。老杜縛雞行山谷水仙花皆然。

夏日六言

醉面貪承夕露。釣竿喜近秋風。借問孤舟何處。深入芙蓉浦中。  
溪漲清風拂面。月落繁星滿天。數隻船橫浦口。一聲笛起山前。

夏夜泛溪至南莊復回湖桑歸

不求奇骨可封侯。但喜枯腸不貯愁。數點殘燈沽酒市。一聲柔櫓採菱舟。  
元知澤國偏宜夜。已就天公探借秋。歸過三更風露重。紗巾刺覺髮飈飈。

郊行

淒風吹雨過江城。緩策羸驂並水行。古路初驚秋葉墮。荒郊已放候蟲鳴。  
壯心耿耿人誰識。往事悠悠恨



未平斜日羊竿羌笛怨。西陵寂寞又潮生。  
結有神韻

文章

文章本天成。妙手偶得之。粹然無疵瑕。豈復須人為。君看古彝器。巧拙兩無施。漢最近先秦。固已殊瀟漓。胡部何為者。豪竹雜哀絲。后楚不復作。千載誰與期。深識妙解非淺人。所能與游常言詩。欲工而工亦非詩之極。鍛鍊之久乃失本指。斷削之甚反傷元氣。觀其所言其自命可知矣。李東陽謂宋人之詩。但一字一句對偶雕琢之工。而天真與致未可與道者。不知能識此意否。

楊大鶴曰。放翁詩至萬首。然翁又言文章本天成。妙手偶得之。粹然無疵瑕。豈復須人為。自言開為長。謠短章。楚詞長律。酬答風月煙雨之態度。非為娛耳目遣夏日而已。此豈粘頭綴尾朝鑄夕琢必待月。久歲深以多作為能者哉。

思蜀

西遊陳迹浩無窮。回首真同一夢中。柳拂驛牆思鳳集。鼓喧市里憶蠶叢。故人邱壠秋蕪碧。舊隱園林夕照紅。自閔未能忘感慨。浩歌彈劍送飛鴻。

江村

江村連夜有飛霜。柿正丹時橘半黃。轉枕却尋驚斷夢。撥爐偶見蕪殘香。醫無絕藝空三易。死與浮生已兩忘。拈得一書還懶看。臥聽孫子誦琅琅。

陳計曰。放翁一生精力盡於七律。故全集所載最多。最佳古詩稍有鬆處。然至其精彩發露。自斑駁可

愛

示兒

死去元知萬事空。但悲不見九州同。王師北定中原日。家祭無忘告乃翁。

祖應世曰放翁易箴嘉定中國弱已極而尚作此想其齋志可悲矣

褚人獲曰示兒一絕有三呼渡河之意

周之麟曰觀於家祭無忘之語千秋之下亦為長慟此其用心與予美何以異哉